

Pantun
MELAYU

Wahisayah
BANGSA

AMINA HAJI NOOR

*With Compliments
from*
IQRA' PUBLICATIONS

Diterbitkan oleh:

IQRA' PUBLICATIONS
8A Jalan Pandan 8/8, Pandan Jaya
55100 Kuala Lumpur
Tel: 03-92003775 Fax: 03-9876786

Diedarkan oleh

MEHRAJ BOOK DISTRIBUTORS
10 Jalan Pandan 8/8, Pandan Jaya
55100 Kuala Lumpur
Tel: 03-9875786 / 9878786 Fax: 03-9876786

© Iqra' Publications

Hakcipta terpelihara. Tiada bahagian di dalam buku ini boleh diterbitkan semula, disimpan untuk pengeluaran atau ditukarkan ke dalam apa-apa bentuk atau dengan alat apa juga, sama ada dengan cara elektronik, mekanik, penggambaran semula, rakaman atau sebagainya, tanpa kebenaran bertulis daripada Iqra' Publications terlebih dahulu.

ISBN 983-146-041-3

Cetakan Pertama Jun 2000

Dicetak oleh:

Maju Jaya Indah Sdn. Bhd.
Ampang

APB 01019590
NASKHAH PEMELIHARAAN
PERPUSTAKAAN NEGARA MALAYSIA

22 MAY 2001

M
899.231P
AM1

100
100

PRAKATA

Hanya jauhari saja yang mengenal manikam. Pantun tradisional semakin hari semakin pupus dihanyutkan oleh arus modenisasi. Hal ini berlaku kerana tidak banyak di kalangan kita yang memahami dan menghargai warisan budaya kita ini.

Pantun Melayu adalah lambang budaya kita. Semakin mendalam kajian yang dibuat mengenainya, semakin banyak lagi perkara yang patut kita ketahui mengenai pantun tradisional ini.

Sebenarnya pantun yang berbentuk lisan mahupun tulisan merupakan khazanah kesusasteraan yang harus kita jaga dan pelihara setiap masa. Kita harus berusaha membina asas yang kukuh di dalam jiwa dan menyemai rasa cintakan budaya terutama di kalangan penuntut sekolah hari ini supaya mereka tidak mudah diperkotak-katikkan oleh budaya asing. Di sinilah pantun tradisional itu dirasakan amat perlu dipelajari.



KANDUNGAN

Pantun Melayu Warisan Bangsa

Isi Kandungan:

* Pantun Kasih	1
* Pantun Nasihat	69
* Pantun Dua Kerat	128
* Pantun Enam Kerat	139
* Pantun Lapan Kerat	148
* Pantun Sepuluh Kerat	154
* Pantun Berkait	157
* Pantun Peribahasa	177
* Pantun Teka-Teki	192



*Pantun
Kasih*



1. Semalam saya mimpikan bulan,
Nyir gugur dengan tandannya;
Tidur semalam mimpikan tuan,
Rasa kutidur di bantal lengannya.

2. Jangan harap kepada padi,
Mari ditanam dalam gembia;
Jangan harap kepada mimpi,
Hari siang manalah dia?

3. Hari panas menjemur tidak,
Saya biasa jemur di batu;
Bentang tikar, tidur tidak,
Saya biasa tidur di pangku.

4. Hendak gugur, gugurlah nangka,
Jangan menimpa si dahan pauh;
Hendak tidur, tidurlah mata,
Jangan dikenang orang yang jauh.

5. Perahu baharu, temberang pun baharu,
Baharu sekali masuk Melaka;
Abang baharu, adik pun baharu,
Baharu sekali kenal biasa.

6. Jikalau tidak kerana bintang,
Masakan bulan terbit tinggi;
Jikalau tidak kerana abang,
Masakan saya datang ke mari.

7. Malam ini malam Jumaat,
Pasang lilin di atas peti;
Tepuk bantal, panggil semangat,
Supaya bertemu dalam mimpi.

8. Sekocak, mendua kocak,
Air seteguk saya tapiskan;
Tengah malam, bangun mengucap,
Bantal dipeluk saya tangiskan.





9. Tinggi-tinggi si matahari,
Anak kerbau mati tertambat;
Sekian lama saya mencari,
Baharu sekarang saya mendapat.

10. Guruh berbunyi sayup-sayup,
Orang di bumi semua bimbang;
Jika ada angin bertiup,
Adakah bunga hendak kembang?

11. Memutih ombak di rantau,
Petang dan pagi tidak bersela;
Memutih bunga di pulau,
Setangkai sahaja yang menggila.

12. Belayar masuk Kuala Kedah,
Patah tiang timpa kemudi;
Sekuntum bunga terlalu indah,
Sekalian kumbang asyik berahi.

13. Layang-layang jatuh melayang,
Jatuh ke laut disambar jerung;
Siapa kata saya tak sayang?
Kalau bunga rasa nak gendong.
14. Kalau tuan pergi ke tanjung,
Belikan saya pisau lipat;
Kalau tuan menjadi burung,
Saya menjadi benang pengikat.
15. Naik bukit membeli mangkuk,
Mangkuk berisi buah berangan;
Tahan racik burung tak masuk,
Burung biasa makan di tangan.
16. Zaman berperang Raja Burma,
Peluru sampai di pucuk kayu;
Seekor kumbang menyeri bunga,
Kumbang terbang bunga pun layu.





17. Burung pipit terbang ke cangkat,
Tempat orang menanam pala;
Pipi tersenyum, kening diangkat,
Bagaimana saya tak gila.

18. Sakit kaki ditikam tunggul,
Tunggul kecil di bawah rumah;
Sakit hati pandang sanggul,
Sanggul kecil berisi bunga.

19. Dari mana punai melayang?
Dari paya turun ke padi;
Dari mana datang sayang?
Dari mata turun ke hati.

20. Padi ini padi Melaka,
Belum direndang, bertih dahulu;
Hati aku hati celaka,
Belum dipandang kasih dahulu.

21. Rumah kecil pintu ke laut,
Tempat orang menggesek biola;
Tubuh kecil bagai diraut,
Di situ tempat hatiku gila.
22. Kelip-kelip api di dusun,
Anak Keling bergelang kaca;
Bukan mati kerana racun,
Mati dijeling ekor mata.
23. Apa guna pasang pelita,
Jika tidak dengan sumbunya;
Apa guna bermain mata,
Kalau tidak dengan sungguhnya.
24. Bunga rampai di dalam puan,
Bunga selasih di dalam peti;
Sebelum jumpa dengan tuan,
Sungguh hidup, terasa mati.





25. Anak beruk di kayu rendang,
Turun mandi di dalam paya;
Hodoh buruk di mata orang,
Cantik manis di mata saya.
26. Padi muda jangan dilurut,
Kalau dilurut, pecah batang;
Hati muda jangan diturut,
Kalau diturut, salah datang.
27. Banyak orang bergelang tangan,
Saya seorang bergelang kaki;
Banyak orang larang jangan,
Saya seorang turut hati.
28. Tekukur digulai lemak,
Selasih di bawah batang;
Sudah lumpur jalan pun semak,
Sebab kasih saya datang.

29. Kepinting, ketam kepinting,
Sehari-hari merendang lada;
Jikalau tidak hutan mendinding,
Sehari-hari bertentang mata.
30. Tampak bendera terkibar-kibar,
Tampak dari atas bukit;
Hati tidak boleh tahan sabar,
Kalau digagahi jadi penyakit.
31. Anak pelanduk di luar pagar,
Sayang patah sebelah kakinya;
Tujuh tahun gunung terbakar,
Baru sekarang nampak apinya.
32. Kalau padi, katakan padi,
Tidak saya tertampi-tampi;
Kalau jadi katakan jadi,
Tidak saya ternanti-nanti.





33. Layang-layang di atas bukit,
Kayu tengar dari seberang;
Cinta sayang bukan sedikit,
Racun penawar tuan seorang.
34. Orang berinai berhitam kuku,
Mandi dijirus air mawar;
Tuan seorang biji mataku,
Racun diminum jadi penawar.
35. Tujuh hari dalam hutan,
Air tak minum, nasi tak makan;
Sehari tiada pandang tuan,
Rasanya susut tubuh di badan.
36. Terang bulan condong ke paya,
Buah rambai di dalam dulang;
Tiada orang semacam saya,
Duduk ramai bercinta seorang.

37. Pucuk paku diperbuat timba,
Terbang bangau ke seberang;
Tidak kuasa menanggung hiba,
Duduk termangu sorang-sorang.
38. Kalau tuan pergi ke Kedah,
Singgah semalam di Kuala Muda;
Tuan laksana kuntum yang indah,
Ditunggu oleh burung geroda.
39. Apa lauk nasi rendam,
Sayur petola dinihari;
Apa ubat hati yang dendam,
Gesek biola tarikkan nyanyi.
40. Singapura negeri baru,
Tuan Raffles menjadi raja;
Bunga melur, cempaka biru,
Kembang sekuntum di mulut naga.





41. Terang bulan terang ke paya,
Anak gagak memakan padi;
kalau tuan kurang percaya,
Belah dada lihatlah hati.
42. Pukul gendang ditiup serunai,
Raja berangkat ke seberang;
Putih mata si burung punai,
Kayu ara ditunggu helang.
43. Orang duduk di muka pintu,
Ambil pisau memotong nenas;
Sebab tuan cakap begitu,
Hatiku sejuk menjadi panas.
44. Tengah hari masuk hutan,
Potong rumput di tepi perigi;
Asyik punggung kepada bulan,
Bulan dikawal rajawali.

45. Lipat kain, lipatlah baju,
Mari kulipat di dalam puan;
Sukat air menjadi batu,
Baru saya lupakan tuan.
46. Buah jering di atas para,
Diambil budak sambil berlari;
Kering laut tanah Melaka,
Baharu saya mungkir janji.
47. Tuan Haji memakai jubah,
Singgah sembahyang di tempat terang;
Teluk tanjung lagi berubah,
Inikan pula hati orang.
48. Permata jatuh di dalam rumput,
Jatuh di rumput gilang-gemilang;
Kasih umpama embun di hujung rumput,
Datang matahari nescaya hilang.





49. Belayar kapal bertimbang arus,
Patah kemudi sepanjang pantai;
Tuan laksana cindai yang halus,
Alah membeli menang dipakai.
50. Kalau tuan pergi ke bendang,
Jangan petik buah rumbia;
Tuan laksana bulan yang terang,
Cahaya liput serata dunia.
51. Terang bulan terang ke paya,
Raja Mesir bertenun kain;
Tuan dipandang bertambah cahaya,
Rasaku tidak pada yang lain.
52. Sungguh banyak bintang di langit,
Bulan juga yang bercahaya;
Sungguhpun banyak muda yang manis,
Tuan juga di mata saya.

53. Inderagiri pasirnya lumat,
Kerang berjemur dengan lokan;
Bagaimana Nabi kasihkan umat,
Begitulah saya kasihkan tuan.
54. Burung merpati terbang seribu,
Hinggap seekor di tengah laman;
Hendak mati di hujung kuku,
Asal berkubur di tapak tangan.
55. Bulan terang di Pulau Upeh,
Tempat raja menjemur pinggan;
Saya seumpama kain putih,
Apa suka tuan warnakan.
56. Kalau roboh kota Melaka,
Papan di Jawa saya dirikan;
Kalau sungguh bagai dikata,
Nyawa di badan saya serahkan.





57. Belah-belung bunyi malam,
Bunyi di atas bumbung penghulu;
Allah belum menjadikan alam,
Kita sudah berjanji dahulu.
58. Tiup api panggang tilan,
Anak raja pulang menjala;
Hidup mati di tangan tuan,
Adik tidak banyak bicara.
59. Burung punai terbang sekawan,
Entah tidak kembali lagi;
Tuan laksana kain kapan,
Hancur tidak berganti lagi.
60. Ambil pena tuliskan surat,
Mari ditulis di atas batu;
Dari dunia sampai akhirat,
Badan dua menjadi satu.

61. Asap api empun berderai,
Cacak galah haluan perahu;
Hajat hati tak hendak bercerai,
Kehendak Allah siapalah tahu.
62. Kalau tuan mudik ke hulu,
Carikan saya bunga kemboja;
Kalau tuan mati dahulu,
Nantikan saya di pintu syurga.
63. Bunga melur kembang sekaki,
Mari dibungkus dengan kertas;
Di dalam telur lagi dinanti,
Inikan pula sudah menetas.
64. Pagi-pagi awan berlari,
Bintang sebiji membelah bukit;
Kalau dapat gambar di hati,
Dunia dipandang tinggal sedikit.





65. Jelatik burung jeladan,
Tekukur terbang tinggi;
Sama cantik sama padan,
Kalau diukur, sama tinggi.
66. Baik-baik belayar malam,
Arus deras, karangnya tajam;
Kalau tidak malim yang faham,
Di situ banyak kapal tenggelam.
67. Ada suatu kapal Surati,
Mati tukang mati kelasi;
Kalau tak dapat bagai di hati,
Biarlah bujang sampai ke mati.
68. Buah sauh dalam keranjang,
Dibawa dari pekan Petani;
Sungguh jauh, tali panjang,
Punca ada di tangan kami.

69. Singapura dilanggar todak,
Alah berkubu batang pisang;
Orang tua berlaki budak,
Bagai bulan dipagar bintang.
70. Layang-layang menyambar buih,
Tetak jeruju buang selupat;
Kasih sayang dicari boleh,
Yang setuju jarang mendapat.
71. Apa guna berkain batik,
Kalau tidak dengan sucinya;
Apa guna berbini cantik,
Kalau tidak dengan budinya.
72. Apa kena padaku ini,
Sini sangkut, sana pun goyang;
Apa kena hatiku ini,
Sini sangkut, sana pun sayang.





73. Jalan-jalan, sepanjang jalan,
Singgah-menyinggah di pagar orang;
Pura-pura mencari ayam,
Ekor mata di anak orang.
74. Teritip, tiram tergantung,
Limau manis banyak bijinya;
Pilih-pilih muda sekampung,
Hitam manis baik budinya.
75. Berang-berang si tampuk manggis,
Sayang durian gugur bunganya;
Hitam-hitam, kupandang manis,
Putih kuning apa gunanya.
76. Baju putih butang tembaga,
Pakaian anak Raja Melaka;
Mata panjang, hati celaka,
Di mana pandang di situlah suka.

77. Di sini merak, sana pun merak,
Merak seekor di hujung tanjung;
Di sini hendak, di sana pun hendak,
Badan seorang tidak tertanggung.
78. Hilang dadu di dalam dadih,
Daduh bercampur minyak lada;
Hilang malu kerana kasih,
Rindu hati bercampur gila.
79. Orang mengail di lubuk Bulang,
Apa umpannya, kulit duku;
Bermain dengan kekasih orang,
Nyawa bergantung di hujung kuku.
80. Bangsal di hulu kerapatan,
Sayang durian gugur bunganya;
Sesal dahulu pendapatan,
Sesal kemudian apa gunanya.





81. Nyiur manis lebat setandan,
Masak di bawah mayang mengurai;
Laksana buah duduk tersimpan,
Isi di dalam dikerebok tupai.
82. Teritip di tepi kota,
Mari dikayuh sampan pengail;
Imam, khatib lagi berdosa,
Inikan pula kita yang jahil.
83. Satu dua tiga empat,
Lima enam tujuh setengah;
Berapa tinggi tupai melompat,
Sekali-sekala jatuh ke tanah.
84. Niat hati nak pancing temenung,
Sudah terpancing ikan setoka;
Niat hati nak peluk gunung,
Sudah terpeluk biawak celaka.

85. Kalau tuan pergi ke bendang,
Baju merah baru dijahit;
Tuan laksana timun dendang,
Di luar merah, di dalam pahit.
86. Selasih di tepi tubir,
Tanam bendera di tepi perigi;
Kasih tuan di tepi bibir,
Tidak mesra ke dalam hati.
87. Manis sungguh tebu seberang,
Dari akar sampai ke pucuk;
Manis sungguh mulut orang.
Kena tipu di dalam pujuk.
88. Kapal belayar ke Pulau Pinang,
Singgah berlabuh di hujung tanjung;
Bagaimana boleh hatiku senang?
Sangkarnya satu, dua burung.





89. Sudah tahu peria pahit,
Siapa suruh petik bunganya?
Sudah tahu saya tak baik,
Siapa suruh dari mulanya?
90. Singapura bernama selat,
Selat bernama negeri baru;
Pura-pura tidak melihat,
Hati di dalam bagai digaru.
91. Limau manis condong ke paya,
Boleh buat ampai kain;
Mulut manis kepada saya,
Hati kasih pada yang lain.
92. Bintang tujuh tinggal enam,
Jatuh sebiji di Majapahit;
Hilang sepuh nampak senam,
Baru tahu tuan tak baik.

93. Andoman kusangka hantu,
Nampak dari Kuala Aceh;
Rosak iman kerana nafsu,
Rosak hati kerana kasih.
94. Pisau raut hilang di rimba,
Pakaian anak raja di Jeddah;
Karam di laut boleh ditimba,
Karam di hati bilakan sudah?
95. Pagar-pagar dengan kayu,
Pokok limau di tepi paya;
Berapa saya pujuk rayu,
Tuan tak mahu apakan daya.
96. Kalau tuan menebang jati,
Biar sepih tumbang jangan;
Kalau tuan mencari ganti,
Biar lebih kurang jangan.





97. Hendak hujan, hujan sekali,
Boleh saya berkajang kain;
Hendak buang, buang sekali,
Boleh saya mencari lain.
98. Orang belayar lautan Ambun,
Patah tiang dengan kemudi;
Putus benang boleh disambung,
Patah arang susah sekali.
99. Asal kapas menjadi benang,
Asal benang menjadi kain;
Yang lepas jangan dikenang,
Sudah menjadi hak orang lain.
100. Orang mengail di lubuk batu,
Dapat seekor ikan gelama;
Hilang satu, berganti satu,
Masakan sama orang yang lama.

101. Pulau Pinang bandaraya baru,
Kapten Light menjadi syahbandar;
Jangan dikenang zaman dahulu,
Duduk mengalir si air mata.
102. Lain hulu lain parang,
Saya kerja di atas bukit;
Lain duhulu, lain sekarang,
Jauh beza bukan sedikit.
103. Lipat kain bersimpul pulih,
Mari ditaruh haluan perahu;
Tempat main boleh dipilih,
Tempat jatuh siapa yang tahu.
104. Rumah kecil tiang seribu,
Rumah gedang terpanggung;
Dari kecil timangan ibu,
Sudah besar timangan untung.





105. Berapa tinggi pucuk pinang,
Tinggi lagi asap api;
Berapa tinggi Gunung Ledang,
Tinggi lagi harap dihati.
106. Pulau Sembilan tinggal delapan,
Satu merajuk ke Kuala Kedah;
Sudahlah nasib permintaan badan,
Kita di bawah kehendak Allah.
107. Tampak api di Tanjung Tuan,
Kuala Linggi bakaunya rendah;
Harap hati kepadamu tuan,
Langit yang tinggi dipandang rendah.
108. Daun terap di atas bukit,
Tempat berjemur buah pala;
Harap hati bukan sedikit,
Sebanyak rambut di atas kepala.

109. Pokok lada tumbuh sebatang,
Pokok cempedak sudahpun rebah;
Selagi ada bulan dan bintang,
Kasihku tidak akan berubah.
110. Anak Benggali membeli halia,
Singgah pula di kedai Cina;
Benarkah abang kasihkan saya,
Kalau benar apa buktinya?
111. Sungguh harum bunga sena,
Dibeli oleh orang kaya;
Sedalam mana Lautan Cina,
Dalam lagi harapan saya.
112. Tangkap ikan di dalam paya,
Ambil lidi di rumah bidan;
Jangan hancurkan harapan saya,
Kalau tidak merana badan.





113. Pergi kedai membeli kaya,
Datang pula si anak Cina;
Jika abang tinggalkan saya,
Makan tak lalu tidur tak lena.
114. Belayar sampai ke negeri China,
Bawa bersama bakul dan raga;
Hari mana bulan pun mana,
Ada jodoh bertemu juga.
115. Ke Bukit Temiang rebus ketupat,
Mengucai lempuk di Kampung Beseri;
Kalau kupinang-pinang tak dapat,
Kupujuk-pujuk kubawa lari.
116. Nasi kunyit gulai ayam,
Singgah makan di Batas Lintang;
Songkok senget berjalan malam,
Abang nak cari si sanggul lintang.

117. Batu Lima di Batas Liku,
Tempat orang menunggang kuda;
Kuntum bunga tunjuk kelaku,
Bagaimana abang rasa tak gila.
118. Akar tuba di Gunung Sapi,
Akarnya panjang menjalar-jalar;
Jangan cuba bermain api,
Nanti kelak tangan terbakar.
119. Kuala Tunggang di Padang Sising,
Tempat orang pasang penangin;
Sanggul lintang bunga disunting,
Bagaimana abang tak teringin.
120. Bukit Chuping Gua Berangin,
Tempat orang mengambil baja;
Putih kuning jangan dok ingin,
Banyak orang dok balik saja.





121. Ayam terbang dari Sentul,
Balik makan padi huma;
Ayuh abang jangan masyghul,
Adik nak balik taklah lama.
122. Apa guna panggang belibis,
Panggang punai ada di atap;
Apa guna tubuh panjang nipis,
Rendah munai sedap didakap.
123. Kalau tumbuh padang temucut,
Tempat selamat bermain pedang;
Kalau sungguh janji tak lucut,
Beri alamat kanda nak pegang.
124. Pisang kemanang tumbuh di batu,
Buah ada jantung tidak;
Sudah malang untung nasibku,
Tuah ada untung tidak.

125. Asam paya bawa ke hutan,
Limau purut banyaklah biji;
Apa daya kehendaknya Tuhan,
Kalau tak turut rosaklah hati.
126. Dari Bintong ke Ayer Hangat,
Tiba di Jalan Bakar Sampah;
Langit tergantung bumi senget,
Kasih kita jangan berubah.
127. Ayuh jelutung kayu di rimba,
Mati tertimpa kayu kelat;
Sudah untung kita berdua,
Umpama ikan di dalam belat.
128. Pokok pauh di atas permatang,
Tetak tengah papan kemudi;
Dari jauh kekanda datang,
Mendengarkan adinda tinggal di sini.





129. Itik belang pekaka belang,
Turun mandi di waktu subuh;
Adik seorang abang seorang,
Kalau mati bertindih tubuh.
130. Dua tiga kucing berlari,
Manakan sama si kucing belang;
Dua tiga saya mencari,
Manakan sama adinda seorang.
131. Tempat nyiur pauh janji,
Disemai oleh Cik Nyonya;
Intan belum bersepuh lagi,
Kanda datang mencanaikannya.
132. Asal kaca menjadi batu,
Batang dedap buatkan titi;
Jika adinda kata begitu,
Alangkah senang di dalam hati.

133. Tenang belayar di Kuala Puju,
Dipukul angin dari buritan;
Sudah dapat kasih yang setuju,
Seperti paku lekat di papan.
134. Gunung hijau tinggi menawan,
Tempat nyiur pauh janji;
Ayuhai kekanda muda rupawan,
Intan belum bercanai lagi.
135. Baju kecil tangan sekerat,
Habis minyak sebelah bahu;
Perkara kecil jangan melarat,
Kerana nanti banyak orang tahu.
136. Ayam Bugis menyabung tali,
Mari berlaga Alur Kesinai;
Adik putih cuba lalu lagi,
Berpaling tengok abang nak kenal.





137. Anak lang di kayu mati,
Patah ranting terbanglah dia;
Saya datang tumpang berhenti,
Kecut hati berjalanlah saya.
138. Apa akal kita ke Bangkalih,
Buah kundur belah dua;
Apa akal nak bagi boleh,
Satu sangkar burungnya dua.
139. Apa guna nasi daun,
Nasi setalam rasa nak basi;
Apa guna tinggal setahun,
Tinggal semalam rasa nak mati.
140. Apa guna pasang pelita,
Kerana sumbu habis minyak;
Apa guna main mata,
Yang itulah bagi tahu orang banyak.

141. Bagaimana nak tanam selasih,
Tanamlah mari di rumpun keladi;
Bagaimana hati nak kasih,
Kasih bercampur denganlah budi.
142. Panjang dahan panjang bertiga,
Buah berangan dipecah-pecahkan;
Hajat tuan, hajat kami juga,
Kecil tapak tangan nyiru kami tadahkan.
143. Bunga mekar di dalam taman,
Bunga cempaka di tepi dinding;
Wahai tuan, wahai teman,
Bolehkah kami masuk bersanding?
144. Sayang selasih bijinya kembang,
Lalu direndam di dalam belanga;
Kami membawa seekor kumbang,
Bolehkah kami menyerikan bunga?





145. Jangan tebang pokok halia,
Ambil buluh dibuat lukah;
Jika abang sayangkan saya,
Bulan depan kita menikah.
146. Sayang-sayang buah kepayang,
Ikan gelama di kedai Cina;
Abang sayang, saya pun sayang,
Sama-sama membina istana.
147. Sungguh dalam Tasik Cini,
Pergi ke pekan melalui titi;
Jika musnah cintaku ini,
Tidak akan ada pengganti.
148. Taman bunga di depan halaman,
Anak dara tinggalkan pesan;
Harum sungguh bunga di taman,
Ingin kusunting buat hiasan.

149. Jangan ditebang pohon berangan,
Pokok petai di tepi jati;
Kasih abang tiada tandingan,
Biarkan belai hingga ke mati.
150. Pergi berjalan ke rumah Baba,
Makan kuah bersama selasih;
Bagai bulan jatuh ke riba,
Begitu tuah orang berkasih.
151. Sungguh harum bunga yang kembang,
Tanam mari si orang kaya;
Jika berubah kasih abang,
Akan terlerai harapan saya.
152. Banyak orang membeli juadah,
Ikan haruan jangan dituba;
Seribu janji ditabur sudah,
Menanti bulan jatuh ke riba.





153. Ramai orang membeli selasih,
Tangkap ikan di dalam paya;
Abang kasih, saya pun kasih,
Ijab kabul tanda setia.
154. Jangan dibuang buah papaya,
Masak lada bersama kerang;
Apa diharap kepada saya,
Budi tiada harta pun kurang.
155. Anak raja duduk di takhta,
Beras pulut tidak bertampi;
Jika abang jauh di mata,
Ingatkan saya di dalam mimpi.
156. Pohon pelam, pokok jati,
Tanam bersama pokok manggis;
Jauh di mata dekat di hati,
Terkenang abang saya menangis.

157. Masak kanji menjadi bubur,
Semut merah hidup merata;
seribu janji telah ditabur,
Abang pergi tanpa berita.
158. Buah keras, buah keranji,
Makan pula sambil menari;
Mengapa abang mungkiri janji,
Merana saya setiap hari.
159. Ambil parang sama gergaji,
Pergi kedai membeli cuka;
Jangan abang menabur janji,
Kalau hati terhiris luka.
160. Pohon beringin pohon selasih,
Tangkap ikan gunakan pukot;
Saya ingin menumpang kasih,
Jika tak sudi apa nak buat.





161. Di tepi paya bulan mengambang,
Dalam kolam itik berenang;
Merana saya ditinggal abang,
Ingatkan Tuhan saya pun tenang.
162. Sungguh jauh rumah mak bidan,
Sungai Balak airnya tenang;
Biar lusuh kain di badan,
Jasa tuan tetap kukenang.
163. Anak siput, anak haruan,
Tebang kelapa ambillah umbut;
Rapuh benar kasihmu tuan,
Bagai embun di hujung rumput.
164. Tepi ru si pokok lada,
Pokok kelapa jangan ditebang;
Biar beribu lelaki menggoda,
Saya tak akan lupamu abang.

165. Buah selasih, buah kepayang,
Asam keping, si asam jawa;
Di sana kasih di sini sayang,
Di mana badan akan kubawa.
166. Pokok jering pokok kelapa,
Buah dedap tidak berkanji;
Biar kering lautan Melaka,
Saya tetap tunaikan janji.
167. Musim hujan menanam padi,
Bakar pula anak tenggiri;
Kalau tuan sudah tak sudi,
Biar saya membawa diri.
168. Tangkap haruan, haruan disiang,
Buah jadam dibuat ubat;
Abang sayang, saya pun sayang,
Tiada jodoh apa boleh buat.





169. Biar sedikit jangan tiris,
Anak gadis membeli kain;
Hati sakit bagai dihiris,
Abang sudah ada yang lain.
170. Kalau membeli buah cempedak,
Petik juga si asam jawa;
Bercerai kasih bertalak tidak,
Seribu tahun bertemu jua.
171. Bunga kiambang buah papaya,
Tanam pula tepi perigi;
Jika abang bencikan saya,
Jangan sebut namaku lagi.
172. Anak Benggali, anak Hindu,
Ikan buntal, ikan selangat;
Abang rindu saya pun rindu,
Tepuk bantal panggil semangat.

173. Pergi kedai membeli kucai,
Masak lemak ikan haruan;
Biar hancur tulang berkecai,
Aku tak lupa padamu tuan.
174. Buah binjai di atas dahan,
Buat pondok untuk berteduh;
Berdoa kita kepada Tuhan,
Panjang umur temukan jodoh.
175. Banyak ikan sudah dijemur,
Jemur bersama bunga kiambang;
Murah rezeki panjangkan umur,
Dapat berbakti kepada abang.
176. Beli berangan bersama halia,
Pokok dedap tidak berbuah;
Abang jangan bencikan saya,
Kasih saya tidak berubah.





177. Anak tebuang di atas dahan.
Ambil betik buat halua;
Jodoh pertemuan di tangan Tuhan,
Ada nasib bertemu jua.
178. Mari kita pergi Melaka,
Tangkap pula si anak helang;
Abang suka saya pun suka,
Orang tua pula menghalang.
179. Ramai orang membuat rakit,
Bunga kiambang di atas batang;
Hati sakit badan pun sakit,
Menunggu abang tak kunjung datang.
180. Pokok kering tidak berdahan,
Kapal belayar tiada haluan;
Bagai pungguk rindukan bulan,
Begitu saya rindukan tuan.

181. Jangan panjat si bunga Cina,
Kalau mati tidak berpucuk;
Tuan buat bena tak bena,
Kasih yang hangat menjadi sejuk.
182. Cik Nani berbaju kurung,
Sambil memikat si burung helang;
Saya ini umpama burung,
Jika terjat tak dapat terbang.
183. Kain batik berbaju kasa,
Tersangkut pula di pokok berduri;
Hati tak kasih jangan dipaksa,
Nanti boleh meracun diri.
184. Bila ditebang pokok halia,
Tumbuh pula pokok beringin;
Bila abang tak kisahkan saya,
Biar saya beralih angin.





185. Bulan mengambang cahaya indah,
Beli pula buah papaya;
Rindukan tuan kasih tak sudah,
Jangan tuan lupakan saya.
186. Manis sungguh si buah manggis,
Makan bersama rebus keladi;
Apa guna saya menangis,
Kalau orang sudah tak sudi.
187. Tumbuh melata pohon peria,
Petik bersama pucuk pegaga;
Mari kita berjanji setia,
Kasih dipadu sampai ke syurga.
188. Tanam halia tidak berdahan,
Kutip pula bunga melati;
Berdoa saya kepada Tuhan,
Biar jodoh hingga ke mati.

189. Terbang tinggi si burung balam,
Burung jampuk matanya galak;
Harapkan puan siang dan malam,
Mengapa pula pinangan ditolak.
190. Mari pancing anak haruan,
Bila masak dimakan jangan;
Hati tak lupa padamu tuan,
Bila dapat makan sepinggan.
191. Burung punggung tidak bersarang,
Si tua berdayung perahu;
Biar saya terkenang seorang,
Tuan marah saya tak tahu.
192. Pancing haruan di tepi paya,
Sirih pinang di dalam puan;
Biar tuan bencikan saya,
Saya tetap kasihkan tuan.





193. Beli gula bersama peria,
Masak pula bersama ikan;
Telah terkota janji setia,
Harap tuan jangan lupakan.
194. Ikan haruan ikan pari,
Jual di pasar setiap pagi;
Harapkan tuan setiap hari,
Kalau tidak siapa lagi.
195. Pergi pekan membeli gergaji,
Beli juga si ikan buntal;
Harap tuan tunaikan janji,
Makan sepinggan tidur sebantol.
196. Anak kota menanam serai,
Tanam bersama si pohon lada;
Air mata jatuh berderai,
Ingatkan tuan sudah tiada.

197. Terbang rendah burung geroda,
Rambut kusut tidak terurus;
Jangan mudah anda tergoda,
Mulut manis hati tak lurus.
198. Menunggu kapal di pangkalan,
Singgah di pekan membeli ubat;
Kasih putus di tengah jalan,
Hati luka tidak terubat.
199. Minum teh bercampur halia,
Sungai deras tidak pun tenang;
Biar tuan lupakan saya,
Budi tuan tetap kukenang.
200. Nasi ditanak menjadi bubur,
Bunga cina di dalam taman;
Kasihku tanam biarlah subur,
Buah cinta jadi idaman.





201. Ubi ditanam tidak berisi,
Tanam bersama rumput melata;
Awan berarak aku tangisi,
Terkenang adik jauh di mata.
202. Nasi lemak buah bidara,
Makan pula bersama ikan;
Buang emak buang saudara,
Kerana kasih saya turutkan.
203. Pergi kedai bersama teman,
Lalu pula atas jambatan;
Sudah berbunga kasih di taman,
Bila dipetik untuk jambangan.
204. Menanam padi di awal hari,
Buah kelapa, buah berangan;
Puas sudah menabur budi,
Emas juga jadi sanjungan.

205. Budak-budak tidak berbaju,
Emak pula membeli jamu;
Saya rindu abang pun rindu,
Bulan depan kita bertemu.
206. Pergi kedai membeli kaya,
Anak teruna memikul kayu;
Apa dikenang kepada saya,
Kasih dipupuk sudah pun layu.
207. Orang muara menarik kemudi,
Hanyut selasih berdaun muda;
Kuntum mesra tamannya budi,
Sinar kasih payungnya setia.
208. Padang panjang dilingkari bukit,
Bukit dilingkari kayu jati;
Kasih sayang bukan sedikit,
Dari mulut sampai ke hati.





209. Orang Daik bersampan panjang,
Lalu mari laut Burma;
Kasih baik hatiku sayang,
Rasa nak mati bersama-sama.
210. Ribu-ribu merentang jalan,
Anak buaya merentang tasik;
Jika seribu orang berjalan,
Tuan seorang dipandang cantik.
211. Padang lepas padang seringan,
Tempat kuda berlari-lari;
Pandang berbalas dengan jelingan,
Di situlah mula kasih terjali.
212. Bawang merah menggulai lemak,
Bawang putih memasak rendang;
Jalan lecah menempuh semak,
Sebab kasih maka kudatang.

213. Anak haruan berlima-lima,
Mati ditimpa punggur berdaun;
Kasih tuan saya terima,
Menjadi hutang beribu tahun.
214. Terang bulan di malam sepi,
Cahaya memancar ke pokok kelapa;
Hidup di dunia buatlah bakti,
Kepada saudara ibu dan bapa.
215. Tanah baik negerinya besar,
Banyak orang pergi mari;
Ramah baik lagi penyabar,
Banyaklah orang mesra di hati.
216. Orang Aceh pulang ke Aceh,
Sampan berlabuh di waktu pagi;
Hati yang kasih bertambah kasih,
Kasih yang tidak berbelah bagi.





217. Hidupkan api memanggang ikan,
Budak-budak balik menjala;
Hidup mati bersama tuan,
Tidaklah saya banyak bicara.
218. Nyiur gading mayang berjurai,
Kait buah buatkan inti;
Hancur daging tulang berkecai,
Kasih tak ubah sampai ke mati.
219. Dari kuala layar dilingkup,
Ombak gelombang melambung-lambung;
Dari bermula berikat hidup,
Susah dan senang sama ditanggung.
220. Buah amra di hujung dahan,
Buah delima tutup peti;
Berapa susah sama ditahan,
Itulah nama sehidup semati.

221. Angkut-angkut hinggap di parit,
Mengambil lumpur diuntit-untikan;
Walau bertangkup bumi dan langit,
Janji tidak saya mungkirkan.
222. Tun Teja Ratna Benggala,
Pandai membelah lada sulah,
Jikalau tuan kurang percaya,
Mari bersumpah kalam Allah.
223. Buah kenari jatuh bersepah,
Beli benang di kedai Jawa;
Mari kita mengangkat sumpah,
Hidup mati kita berdua.
224. Orang mengail ikan cencaru,
Dapat ikan bawa ke jeti;
Kalau tuan kata begitu,
Barulah senang di dalam hati.





225. Awan lara angin puputan,
Gugur melayang si bunga sena;
Tuan ibarat permata intan,
Saya menumpang sinar cahayanya.
226. Pandan berbunga dalam rimba,
Angin menderu dari Tiku;
Sudah lama tidak bersua,
Kinilah baru kita bertemu.
227. Teluk Kurau Kuala Nerang,
Orang mengail ikan ubi;
Walau buruk di mata orang,
Cantik manis di hati kami.
228. Hisap rokok tembakau Cina,
Keluar asap berbunga-bunga;
Wahai cik adik abang bertanya,
Cik adik sudahkah mempunya?

229. Putih sungguh si beras pulut,
Mari disimpan di dalam peti;
Kasih tuan hanya di mulut,
Kasih kita bawa ke hati.
230. Anak buaya anak memerang,
Anak biawak luka kepala;
Badan merantau sakit dan senang,
Pada adinda sedikit tak lupa.
231. Petik sayur si daun maman,
Makan berulam daun pegaga;
Habis tahun berganti zaman,
Kasih adinda kunanti juga.
232. Hijau nampaknya Bukit Barisan,
Puncak Tanggamus dengan Singgalang,
Terbang nyawa dari badan,
Kasih di hati takkan hilang.





233. Pulau Tinggi terendak China,
Nampak dari Pasir Saribu;
Abang pergi janganlah lama,
Tidak sanggup menanggung rindu.
234. Beli cempedak dari Juana,
Mari dibelah di atas tudung;
Jika berhajat menyunting bunga,
Jumpalah ayah di atas gunung.
235. Pohon beringin di tengah negeri,
Buah lebat di tangkainya;
Mekar mawar dipagar duri,
Sanggupkah tuan menyuntingnya?
236. Tumbuk padi jadikan emping,
Buat juadah teman sebaya;
Pipit hendak bertenggek ke ranting,
Sudikah enggang bertenggek sama?

237. Seri Mersing lagulah Melayu,
Dikarang oleh biduan dahulu;
Hatiku runsing bertambah pilu,
Mengenangkan nasib untung diriku.
238. Kalau tuan pergi ke Tanjung,
Kirim saya sehelai baju;
Kalau tuan menjadi burung,
Saya menjadi ranting kayu.
239. Sandar-menyandar di batang pinang,
Timpa-menimpa di batang padi;
Tembak dengan peluru bertunang,
Kena tak kena, ular pun mati.
240. Tiba di kuala pecah perahunya,
Jurumudi menyorong sampan;
Sampai di kepala pecah baunya,
Tujuh hari saya tak makan.





241. Padi dibawa dari balok,
Tiba di kuala pecah perahunya;
Bunga pun dapat kita nan jolok,
Sampai di kepala pecah baunya.
242. Lembu baru kereta baru,
Baru sekali masuk Melaka;
Adik baru saya pun baru,
Baru ini berkenal biasa.
243. Sayang anak dara berbaju Johor,
Lambang keaslian benang bertekak;
Kita bermesra berbudi luhur,
Semoga Tuhan memberi berkat.
244. Buah kuini di atas para,
Pohon pala tepi perigi;
Hari ini kita bermesra,
Bila pula bersua lagi?

245. Fikir-memikir sama lawak,
Jangan dibawa ke Tanjung Jati;
Sindir-menyindir sesama awak,
Jangan dibawa masuk ke hati.
246. Selasih dekat batang delima,
Mentimun dendang masakny merah;
Kasih pun lekat bersama-sama,
Laksana daging dengan darah.
247. Anak ikan dimakan ikan,
Pukul gendang nyaring bunyinya;
Sahabat bukan saudara bukan,
Badan bertemu kerana untungya.
248. Tanam lada di pohon temu,
Ambil benang di atas peti;
Kalau sudah kita bertemu,
Rasanya senang di dalam hati.





249. Sapu tangan berbunga tekat,
Mari diletak di atas bahu;
Luka di tangan dapat dilihat,
Luka di hati siapa tahu.
250. Air yang dalam bertambah dalam,
Hujan di hulu sudahlah teduh;
Hati yang dendam bertambah dendam,
Dendam dahulu belumlah sembuh.
251. Buah langsung tiga serangkai,
Masak sebiji ke Tanah Jawa;
Apalah ilmu cik adik pakai,
Makin tersenyum makin ketawa.
252. Rumah tepi sawah,
Pasang pula langsir biru;
Emak jangan marah,
Nanti emak dapat menantu.

253. Selat teduh lautan tenang,
Banyak berlabuh perahu Aceh;
Barang lepas jangan dikenang,
Sudah jadi hak orang lain, mengapa bersedih.
254. Asal kapas jadi benang,
Dari benang dibuat baju;
Barang lepas jangan dikenang,
Sudah jadi hak orang lain, mengapa dirindu.
255. Anak punai anak merbah,
Terbang mari membuat sarang;
Anak sungai lagi berubah,
Ini pula hati orang.
256. Tidaklah boleh selandak padi,
Sekamalah juga ditumbuk luluh;
Tidak boleh kehendak hati,
Kehendak Allah juga yang sungguh.





257. Daun selasih mainan budak,
Berdaun sehelai dimakan kuda;
Bercerai kasih bertalak tidak,
Seribu tahun kembali juga.
258. Pagi-pagi pergi ke sawah,
Hendak ditajak pokok mengkudu;
Luka di tangan nampak berdarah,
Luka di hati siapa yang tahu.
259. Anak Benggali pasang lukah,
Lukah dipasang di Tanjung Jati;
Di dalam hati tidak kulupa,
Bagai rambut bersimpul mati.
260. Pukul gendang kulit kerbau,
Dalam majlis tari-menari;
Kami ini daganglah merantau,
Mengharap belas orang di sini.

261. Negeri Pahang aman sentosa,
Kaya dengan tumbuh-tumbuhan;
Niat di hati nak buat jasa,
Mudah-mudahan Tuhan kabulkan.
262. Dari Melaka pergi ke Pahang,
Singgah di Johor beli barangan;
Kami mengucapkan selamat datang,
Apa yang kurang dikeji jangan.
263. Amboi-amboi gadis melenggang,
Lenggang-lenggok jalan diatur;
Jangan dipegang boleh dipandang,
Salah-salah imannya gugur.
264. Putih kuning pinggang ramping,
Bibir merah bak delima merkah;
Badan langsing rambut kerinting,
Hati siapa yang tidakkan gundah.





265. Pucuk pauh delima batu,
Genggam di dalam tangan;
Tuan jauh berbatu-batu,
Hilang di mata di hati jangan.
266. Kalau tidak kelapa puan,
Tidaklah puan kelapa bali;
Harap-harap kepada tuan,
Tidak tuan siapa lagi.
267. Di kiri jalan kanan pun jalan,
Ditengah-tengah pohon melati;
Kirim jangan pesan pun jangan,
Kalaulah rindu datang sendiri.
268. Pulau Pinang laut keliling,
Tempat memancing ikan tenggiri;
Di angin lalu pesan kukirim,
Rindu kutanggung seorang diri.



*Pantun
Nasihat*



269. Bukan tanah menjadi padi,
Kalau jadi hampa melayang;
Bukan bangsa menanam budi,
Kalau tanam cuma terbuang.
270. Penatiah saya menanam padi,
Nenas juga ditanam orang;
Penatlah saya menanam budi,
Emas juga dipandang orang.
271. Kulit lembu celupkan samak,
Mari dibuat tapak kasut;
Harta dunia jangan ditamak,
Kalau mati tidak mengikut.
272. Anak angsa mati lemas,
Mati lemas di air masin;
Hilang bahasa kerana emas,
Hilang budi kerana miskin.

273. Sakit menebang kayu berlubang,
Kayu hidup dimakan api;
Sakit menumpang kasih orang,
Daripada hidup baiklah mati.
274. Kalau ada duit sekupang,
Boleh beli cuka mentahun;
Habis padi burung terbang,
Ulat tidak kenangkan daun.
275. Pukul gendang tiup nafiri,
Anak Keling mandi minyak;
Saya umpama rumput di bumi,
Rendah sekali pada yang banyak.
276. Kapal belayar dari Arakan,
Ambil gaji jadi jemudi;
Mati ikan kerana umpan,
Mati saya kerana budi.





277. Pisang emas dibawa belayar,
Masak sebiji di atas peti;
Hutang emas dapat dibayar,
Hutang budi dibawa mati.
278. Pulau Pandan jauh ke tengah,
Gunung Daik bercabang tiga;
Hancur badan dikandung tanah,
Budi yang baik dikenang juga.
279. Tenang-tenang air di laut,
Sampan golek mudik ke tanjung;
Hati terkenang, mulut tersebut,
Budi yang baik rasa dijunjung.
280. Kalau ada jarum yang patah,
Jangan simpan di dalam peti;
Kalau ada silap dan salah,
Jangan simpan di dalam hati.

281. Saya tidak pandai menari,
Sebarang tari saya tarikan;
Saya tidak pandai menyanyi,
Sebarang nyanyi saya nyanyikan.
282. Sorong papan, tarik papan,
Buah keranji di haluan perahu;
Suruh makan, saya makan,
Suruh mengaji saya tak tahu.
283. Buah cempedak di luar pagar,
Ambil galah tolong jolokkan;
Saya budak baru belajar,
Kalau salah tolong tunjukkan.
284. Hujan ribut belayar ke pulau,
Kelekatu ditimba ruang;
Selagi hidup kita bergurau,
Sudah mati tinggal seorang.





285. Tanjung Katong airnya biru,
Dibuat budak cermin mata;
Sedang sekampung lagi dirindu,
Inikan pula jauh di mata.
286. Pokok terap di tengah padang,
Datang gajah dilelainya;
Tengah sedap mata memandang,
Datang Allah dicerainya.
287. Pucuk pauh delima batu,
Anak sembilang di tapak tangan;
Sungguh jauh, negeri satu,
Hilang di mata, di hati jangan.
288. Laju, laju perahu laju,
Lajunya sampai ke Surabaya;
Lupa kain, lupa baju,
Tetapi jangan lupakan saya.

289. Tuailah padi antara masak,
Esok jangan layu-layuan;
Intailah kami antara nampak,
Esok jangan rindu-rinduan.
290. Kajang tuan kajang melipat,
Kajang saya mengkuang layu;
Dagang tuan dagang bertempat,
Dagang saya terbang lalu.
291. Kiri jalan, kanan pun jalan,
Sama tengah pokok mengkudu;
Kirim jangan, pesan pun jangan,
Sama-sama menahan rindu.
292. Sarawak sungainya sempit,
Buah nenas lambung-lambungan;
Hendak dibawa, perahunya sempit,
Tinggal emas, tinggal junjungan.





293. Dian tiga, lilin pun tiga,
Tanglung tergantung rumah laksamana;
Diam juga sabar pun juga,
Ada umur tidak ke mana.
294. Dari mana hendak ke mana,
Tinggi rumput dari padi;
Tahun mana bulan mana,
Hendak kita berjumpa lagi.
295. Malam ini merendang jagung,
Malam esok merendang serai;
Malam ini kita berkampung,
Malam esok kita bercerai.
296. Anak merak Kampung Cina,
Singgah berhenti kepala titi;
Emas perak kebesaran dunia,
Budi bahasa tak dapat dicari.

297. Banyak ubi perkara ubi,
Ubi keledak ditanam orang;
Banyak budi perkara budi,
Budi baik dikenang orang.
298. Dua belas dayung berkunci,
Dayung pergi tanah seberang;
Sedikit hati saya tak benci,
Jangan didengar fitnah orang.
299. Dewa sakti melayang ke Daik.
Hendak mencari Dewa Jaruga;
Kalau ada budi yang baik,
Sampai ke mati orang tak lupa.
300. Bukan mahal harga perabot,
Tidak ternilai tinggi harganya;
Harta orang jangan direbut,
Kalau direbut buruk padahnya.





301. Cik Molly suka berkebun,
Tebang nenas di tepi paya;
Jangan diharap setitik embun,
Kerana panas keringlah ia.
302. Ayam hutan terbang ke hutan,
Turun ke tanah mencari makan;
Kerana digila burung di hutan,
Denak di rumah mati tak makan.
303. Apa nak kesal kepada tudung,
Tudung saja terendak Bentan;
Apa nak sesal kepada untung,
Sudah untung nasib badan.
304. Anak helang di atas gunung,
Singgah semalam di Bukit Pinang;
Tengah malam bangkit melengung,
Bila tahun kita nak senang.

305. Istana tetamu tersergam indah,
Tempat berehat pemimpin setia;
Industri ilmu terlaksana sudah,
Lahirlah rakyat berwawasan mulia.
306. Menguning padi di Tambun Tulang,
Dituai petani dibawa ke kilang;
Ekonomi berkembang rakyat gemilang,
Wawasan kerajaan terus cemerlang.
307. Sungguh berkhasiat daun pegaga,
Sudah terkenal merata-rata;
Persekitaran indah perlu dijaga,
Sebagai warisan negeri tercinta.
308. Sungguh harum si bunga sena,
Tumbuh pula di rumah pangsa;
Jadilah warga yang berguna,
Dapat kita membela bangsa.





309. Jalan malam terpijak duri,
Melintas sungai di atas titi;
Tingkatkan ilmu majukan diri,
Agar hidup bahagia nanti.
310. Pergi ke kebun menebang buluh,
Buluh ditebang anak Melaka;
Carilah ilmu bersungguh-sungguh,
Buat bekalan di hari muka.
311. Mari kita tanam halia,
Ambil sedikit buat juadah;
Usia muda jangan disia,
Nanti tua sesal tak sudah.
312. Parang tajam tidak berhulu,
Buat menetak si pokok ru;
Bila belajar tekun selalu,
Jangan ingkar nasihat guru.

313. Ramai orang membeli jamu,
Di bawah pokok cuaca redup;
Bersungguh-sungguh mencari ilmu,
Ilmu dicari penyuluh hidup.
314. Gunung tinggi indah berbanjar,
Banyak tumbuh si pohon ara;
Jangan malas apabila belajar,
Tak ada ilmu hidup sengsara.
315. Ramai orang menggali perigi,
Ambil buluh lalu diikat;
Ilmu dicari tak akan rugi,
Buat bekalan dunia akhirat.
316. Tumbuh melata si pokok tebu,
Pergi pasar membeli daging;
Banyak harta tak ada ilmu,
Bagai rumah tidak berinding.





317. Pokok rendang tidak berbunga,
Pokok keledak tumbuh sejajar;
Jadilah anda orang berguna,
Adat dikelek, akhirat dikejar.
318. Indah sungguh gunung berbanjar,
Di tepi sungai tidak berpaya;
Jika gagal dalam belajar,
Cubalah lagi hingga berjaya.
319. Semai padi tidak berbaja,
Ambil betik buat halua;
Tanam dihati rasa reda,
Tentu anda tak akan kecewa.
320. Taruh baju di dalam raga,
Taruh bersama si bunga cina;
Masa itu amat berharga,
Jangan lalai memanfaatkannya.

321. Anak Melaka membeli kasa,
Kasa dibeli bersama acar;
Jangan suka membuang masa,
Masa yang pergi tak dapat dikejar.
322. Singgah sebentar di rumah Cik Esa,
Kerana hendak membeli halia;
Jika pandai membahagikan masa,
Hidup kita tak sia-sia.
323. Ramai orang menanam lada,
Mari jual di kedai Cik Nona;
Jika ilmu penuh di dada,
Ke mana pergi kita berguna.
324. Pergi ke sawah menanam padi,
Singgah di sungai menangkap ikan;
Hidup hendaklah bersendikan budi,
Sifat sombong jangan amalkan.





325. Pergi ke pekan membeli gergaji,
Gergaji disimpan di dalam laci;
Sombong itu sifat yang keji,
Jika diturutkan akan dibenci.
326. Anak muda pergi mengaji,
Singgah pula di rumah Nyonya;
Jangan suka caci-mencaci,
Jika diturutkan buruk padahnya.
327. Tengahari pergi mengail,
Dapat seekor ikan tenggiri;
Jangan amalkan perangai bakhil,
Akan merosak diri sendiri.
328. Ikan siakap ikan senohong,
Dibeli oleh si orang kaya;
Hidup jangan bercakap bohong,
Nanti orang tidak percaya.

329. Anak itik berlari-lari,
Dari malam hingga ke pagi;
Jangan menipu diri sendiri,
Nanti kita juga yang rugi.
330. Orang Daik membeli arang,
Untuk membakar ikan haruan;
Budi yang baik dikenang orang,
Perangai jahat jadi cemuhan.
331. Ramai orang membeli pahat,
Untuk memahat dinding yang kesat;
Rasuah itu perangai jahat,
Jika diamalkan akan tersesat.
332. Sungguh terang cahaya bulan,
Bulan mengambang sungguh menawan;
Hendaklah sabar menempuh dugaan,
Hidup memang banyak cabaran.





333. Kalau menebang si dahan rapuh,
Jangan ditimpa si pohon lada;
Cabaran hidup hendaklah ditempuh,
Janganlah mudah berputus asa.
334. Tengah hari cuaca redup,
Tanam pula pokok halia;
Susah senang mainan hidup,
Usaha selalu agar berjaya.
335. Pohon lada, pohon kepayang,
Gunung jauh nampak berbalam;
Jangan anda mengejar bayang,
Berangan-angan siang dan malam.
336. Sungguh tinggi gunung berbanjar,
Ramai orang pergi bertapa;
Harta dunia jangan dikejar,
Amal ibadat jangan dilupa.

337. Sungguh indah pintu dipahat,
Burung puyuh di atas dahan;
Kalau hendak hidup selamat,
Taat selalu perintah Tuhan.
338. Burung merak lebat bulunya,
Dipikat pula oleh Cik Baba;
Emas dan perak harta dunia,
Ingatlah Tuhan dan ingatlah keluarga.
339. Beramai-ramai menanam padi,
Tanam pula di tengah hari;
Pandai-pandai menanam budi,
Jangan sampai tergadai diri.
340. Pohon beringin, si pohon ara,
Tempat berteduh si anak dara;
Buatlah jasa pada negara,
Supaya jadi seorang perwira.





341. Kera di hutan terlompat-lompat,
Si pemburu memasang jerat;
Hina sungguh sifat mengumpat,
Dilaknat Tuhan dunia akhirat.
342. Ambil batu di tepi perigi,
Ikan di sungai jangan dituba;
Dadah itu meracun diri,
Jangan disentuh, jangan dicuba.
343. Daun jatuh jangan dikutip,
Orang lalu di jalan raya;
Jangan selalu salahkan nasib,
Cuba dahulu hingga berjaya.
344. Parut kelapa perahlah santan,
Ikan kembung dibuat laksa;
Arak dan judi mainan syaitan,
Kalau dicuba akan binasa.

345. Tahankan jerat gunakan tali,
Pacak kuat biar melekap;
Kalau bini suka membeli,
Hutang berbaris suami ke lokap.
346. Orang bertahan di dalam kota,
Kena serangan musuh yang datang;
Berkilau-kilau disangka permata,
Rupanya hanya kaca bertuang.
347. Kayu bakar dibuang arang,
Arang dibakar memanaskan diri;
Jangan mudah menyalahkan orang,
Cermin muka lihat sendiri.
348. Terang bulan di malam sepi,
Cahaya memancar ke pangkal kelapa;
Hidup di dunia buatlah bakti,
Kepada ibu dan bapa.





349. Ketam rencung tak pandai menyepit,
Hendak menyepit jari-jemari;
Enggang sudah berkawan pipit,
Tentu ada muslihat dicari.
350. Bintang tujuh sinar berseri,
Bulan purnama datang menerpa;
Ajaran guru hendak ditaati,
Mana yang dapat jangan dilupa.
351. Kalau meraut bingkai nyiru,
Jangan dirautkan pisau tumpul;
Kalau menuntut biarlah berguru,
Ilmu dituntut barulah betul.
352. Orang menjaga di Kuala Kertau,
Dapat seekor ikan pari;
Kalau tuan pergi merantau,
Pandai-pandai menjaga diri.

353. Pak Kulup anak juragan,
Mati diracun muntahkan darah;
Hidup di dunia banyak dugaan,
Kepada Allah kita berserah.
354. Baik-baik mengirai padi,
Takut mercik ke muka orang;
Biar pandai menjaga diri,
Takut nanti diejek orang.
355. Tulis surat di dalam gelap,
Ayatnya banyak yang tidak kena;
Jagalah diri jangan tersilap,
Jikalau silap awak yang bencana.
356. Kapal belayar menuju Jeddah,
Putus layar berganti tali;
Mencari ilmu bukanlah mudah,
Bukannya boleh dijual beli.





357. Patah gading serpih tanduk,
Mari diletak di atas papan;
Jika tahu ganja itu mabuk,
Buat apakah dia makan.
358. Putus sudah tali temberang,
Semasa belayar di sampan kotak;
Jangan berlagak jaguh yang garang,
Kepala sendiri nanti yang retak.
359. Tikar pucuk tikar mengkuang,
Alas nikah raja Melayu;
Ikan busuk jangan dibuang,
Buat perencah daun kayu.
360. Pergi mendaki Gunung Daik,
Hendak menjerat kancil dan rusa;
Bergotong-royong amalan yang baik,
Elok diamalkan setiap masa.

361. Terang bulan terang bercahaya,
Cahaya memancar ke Tanjung Jati;
Jikalau hendak hidup bahagia,
Beramal ibadat sebelum mati.
362. Kalau tuan mengail ikan,
Janganlah mengail ikan sepat;
Bukankah cikgu sudah berpesan,
Pokok berduri jangan dipanjat.
363. Pakai baju warna biru,
Pergi ke sekolah pukul satu;
Murid sentiasa hormatkan guru,
Kerana gurulah pembekal ilmu.
364. Jikalau tuan mengangkat peti,
Tolong masukkan segala barang;
Jikalau anak-anak bersatu hati,
Kerja yang susah menjadi senang.





365. Buah pelaga makan dikikir,
Dibawa orang dari hulu;
Sebarang kerja hendak difikir,
Supaya jangan mendapat malu.
366. Kalau membeli ketam dan kerang,
Beli di pasar jualan Cik Nyonya;
Kalau pergi ke tempat orang,
Buat gelagat ayam betina.
367. Masuk hutan pakai sepatu,
Takut kena gigitan pacat;
Kalau kita selalu bersatu,
Apa kerja mudah dibuat.
368. Pergi berburu sampai ke sempadan,
dapat kancil badan berjalur;
Biar carik baju di badan,
Asalkan hati bersih dan jujur.

369. Pinang muda dibelah dua,
Anak burung mati dirangghah;
Dari muda sampai ke tua,
Ajaran baik jangan diubah.
370. Daun sirih ulam Cik Da,
makan sekapur lalu mati;
Walaupun banyak ilmu di dada,
Biar merunduk resmi padi.
371. Pergi ke bandar naik kereta,
Kereta rosak tidak boleh dibaiki;
Biar kita miskin dengan harta,
Asalkan kita kaya dengan budi.
372. Bulu merak cantik berkaca,
Gugur sehelai ke dalam baldi;
Jika tak banyak kitab dibaca,
Jangan mengaku khatib dan kadi.





373. Pokok rimbun tepi belukar,
Batang dililit daun reribu;
Bunga mekar dijaga ular,
Carilah akal cara menipu.
374. Kayu cendana di atas batu,
Sudah diikat dibawa pulang;
Adat di dunia memang begitu,
Benda buruk tidak dipadang.
375. Apa guna padi bukit,
Padi di bendang menabur bunga;
Apa guna hati sakit,
Mati bertikam termasyhur lama.
376. Apa guna kepuk di ladang,
Kalau tidak berisi padi;
Apa guna berambut panjang,
Kalau tidak berani mati.

377. Lebah terbebar terbang sekawan,
Hinggap di celah kayu berduri;
Alangkah cabar rupanya tuan,
Dagangan indah tidak terbeli.
378. Rumah besar alang pun besar,
Rumah datuk permaisuri;
Alang tak alang kerja pun besar,
Maka sebabnya saya datang ke mari.
379. Adakah perisai bertali rambut,
Rambut dipintal akan cemara;
Adakah bisai tahu takut,
Kami pun muda lagi perkasa.
380. Burung kenari berkekah,
Berkekah di tengah padang;
Jika tak berani menjarah,
Tiada sah menjadi hulubalang.





381. Lalu berempat orang Kubung,
Ke baruh membawa peta;
Jika tak tahu kata berhubung,
Tiada sah menjadi pegawai.
382. Kedondong batang sumpitan,
Batang padi saya lurutkan;
Tujuh gunung sembilan lautan,
Kalau tak mati saya turutkan.
383. Ditenun kain dengan kapas,
Bermacam-macam warna ragi;
Perahu lilin layar kertas,
Berani kulanggar lautan api.
384. Cik Bulah berketam padi,
Sambil itu menggali telaga;
Tuan pergi ke lautan api,
Biar hangus kuturut juga.

385. Burung empat disangka enam,
Ibunya lari membawa sarang;
Sakit diubat mati ditanam,
Budi itu dikenang orang.
386. Gunung Daik timang-timangan,
Tempat kera berulang- alik;
Budi yang baik kenang-kenangan,
Budi yang jahat buang sekali.
- 387 Sarat perahu muat pinang,
Singgah berlabuh di Kuala Daik;
Budi jahat lagi dikenang,
Inikan pula budi yang baik.
388. Rosak pandan kerana padi,
Rosak padi kerana bunganya;
Rosak badan kerana budi,
Rosak budi kerana orangnya.





389. Limau manis dimakan manis,
Manis sekali rasa isinya;
Dilihat manis dipandang manis,
Manis sekali hati budinya.
390. Pisang emas dibawa ke Bentan,
Masak sebiji di atas panggung;
Hutang emas berganti intan,
Hutang budi badan menanggung.
391. Kalau ada padi seberang,
Tukarlah dengan padi di desa;
Kalau kita tetamu orang,
Biarlah pandai berbudi bahasa.
392. Anak angsa terlemas-lemas,
Berenang mandi di air masin;
Hilang bahasa kerana emas,
Hilang budi kerana miskin.

393. Bunga melati bunga di darat,
Bunga seroja di tepi kali;
Hina besi kerana karat,
Hina manusia tidak berbudi.
394. Dari Daik pulang ke Daik,
Sehari-hari berkebun pisang;
Budi baik dibalas baik,
Dalam hati dikenang orang.
395. Ada padi adalah beras,
Bertanak nasi periuk tembaga;
Ada budi adalah balas,
Orang berbudi kita berbahasa.
396. Baik-baik bertanam ubi,
Biar rapat jangan menjarang;
Biar-baik bertanam budi,
Biar dapat dikenang orang.





397. Hari hujan naik ke sampan,
Dari kuala patah kemudi;
Mati ikan kerana umpan,
Mati saya kerana budi.
398. Pisang nangka dimasak pengat,
Kait-kait banyak durinya;
Macam mana saya tak ingat,
Orang baik dengan budinya.
399. Hendak belayar ke Teluk Betung,
Sambil mencuba labuhkan pukut;
Bulat air kerana pembedung,
Bulat manusia kerana muafakat.
400. Kalau subang sama subang,
Kalau sanggul sama sanggul;
Kalau hilang sama hilang,
Kalau timbul sama timbul.

401. Mangkuk jorong pinggan pun jorong,
Sejorong berisi buah jati;
Dua tiga kata terdorong,
Jangan dibawa masuk ke hati.
402. Gunung Tahan sama didaki,
Sungai Pahang sama direnang;
Jikalau semua bersatu hati,
Kerja yang payah menjadi senang.
403. Jika pelita sudah menyala,
Bawa ke anjung surung;
Kita semua bersaudara,
Sama-sama tolong-menolong.
404. Masa berjalan bawalah tongkat,
Kalau boleh jenis semambu;
Sama sekampung teguhkan pakat,
Kalau tidak musuh berkubu.





405. Cantiknya wajah Puan Syarifah,
Manis senyuman tak dapat diucap;
Hati gajah sama dilapah,
Hati kuman sama dicecap.
406. Orang memukat di Teluk Sepat,
Cuaca gelap beransur terang;
Kalau muafakat tiada didapat,
Sengketa kerap membawa perang.
407. Anak kera di kayu ara,
Lari memanjat ke pohon duku;
Antara negara dengan negara,
Pakat sahabat hendak dituju.
408. Tanah merah tanahnya liat,
Buat menimbun tambak negeri;
Antara pemerintah dengan rakyat,
Kebajikan umum hendak dicari.

409. Baju baru kain bertekat,
Baju belah pakai kerongsang;
Bersatu padu kuat seikat,
Kalau berpecah dimakan orang.
410. Para-para di dahan dedap,
Sangkutkan tali berlembar tiga;
Bahaya dan mara sama dihadap,
Di laut api bersama juga.
411. Kait daun layur di para,
Buat tudung kuih talam;
Pahit maung sama dirasa,
Sama diharung timbul tenggelam.
412. Sirih kuning di batang pauh,
Sayang beluluk beruang-ruang;
Putih kuning carilah jodoh,
Saya buruk biar terbang.





413. Kupas pinang dikupas,
Kalau dikupas ambil bulunya;
Kalau bertunang jangan dilepas,
Jikalau lepas menjadi malunya.
414. Berkuda lagi berlembu,
Perca diambil akan cemara;
Sungguhpun baru bertemu,
Sudah diambil akan saudara.
415. Padi jangan dicampur antah,
Melukut tinggal sekam melayang;
Hatiku jangan diberi patah,
Meskipun saya dagang terbang.
416. Buah berangan dalam kota,
Direndang orang tengah hari;
Jangan tuan kata-mengata,
Takut menimpa hidung sendiri.

417. Jangan dibuka pintu lukah,
Jika dibuka ikan meluru;
Jangan suka mencari salah,
Salah kita baiki dahulu.
418. Jangan ditarik lembu garang,
Kalau ditarik banyak susahya;
Jangan dirosak anak orang,
Kalau rosak malu padahnya.
419. Cili kecil cili Belanda,
Jatuh ke bibir sampai ke lidah;
Tuan kecil lambangan mata,
Tetaplah iman di dalam dada.
420. Banyak batang tumbuh cendawan,
Cendawan kukur jalan ke huma;
Banyak orang mengaku pahlawan,
Sambutlah pukul tikam pertama.





421. Asam jawa pokok di hutan,
Dibawa orang tanam di desa;
Ada nyawa ada harapan,
Tidak kumahu berputus asa.
422. Bunga rampai di dalam cawan,
Cawan bertutup di atas peti;
Selagi tak sampai hajatku tuan,
Sungguh hidup terasa mati.
423. Lemaknya nasi bergulai udang,
Lemak berbau santan kelapa;
Rela kumati berputih tulang,
Tidak kumahu berputih mata.
424. Limau bentan di tepi tingkap,
Budak-budak melempar burung;
Harimau di hutan lagi kutangkap,
Inikan pula cicak mengkarung.

425. Hang Jebat Hang Kasturi,
Budak-budak Raja Melaka;
Jika hendak jangan dicuri,
Mari kita bertentang mata.
426. Bagaimana saya tak ikat,
Kait-kait dengan durinya;
Bagaimana saya tak ingat,
Orang baik dengan budinya.
427. Anak buaya makan di pantai,
Surut pasang makan ke tengah;
Pada hidup bercermin bangkai,
Baiklah mati bergalang tanah.
428. Pohon getah, pohon kelapa,
Ditebang oleh si orang Cina;
Taat perintah ibu dan bapa,
Kalau derhaka buruk padahnya.





429. Jika terjumpa ular tedung,
Carilah kayu, buluh pemukul;
Berani buat beranilah tanggung,
Tangan menjinjing bahu memikul.
430. Ulam tipus bersambal cuka,
Kuah dihirup begitu rakus;
Biar mampus merebut pusaka,
Jangan hidup digelar dayus.
431. Tebu bukannya bangkut,
Rama-rama terbang ke kuala;
Bukan kami kaki penakut,
Berani kami berkorban nyawa.
432. Perahu payang layarnya merah,
Belayar menuju arah utara;
Keris dipegang bersintukkan darah,
Adat pahlawan membela negara.

433. Anak ayam turun tujuh,
Mati seekor tinggal enam;
Nabi Muhammad nabi pesuruh,
Menyuruh umat membawa iman.
434. Anak ayam turun lima,
Mati seekor tinggal empat;
Turut mengikut alim ulama,
Supaya berbetulan jalan makrifat.
435. Masa berada di Pulau Jawa,
Rakan diajak pergi menjala;
Masa berkuasa janganlah lupa,
Kuasa Tuhan tiada terhingga.
436. Pecah cawan di atas peti,
Cawan minum milik Cik Mat;
Tuhan Allah yang maha suci,
Jangan dilupakan setiap saat.





437. Kemumu di tengah pekan,
Dihembus angin jatuh ke bawah;
Ilmu yang tidak diamalkan,
Bagai pohon tidak berbuah.
438. Kapal layar bertiang tiga,
Tiang keempat batangan galah;
Amal ikhtiar bahagian kita,
Hasil pendapat di tangan Allah.
439. Kapal Anjiman disangka hantu,
Nampak dari Kuala Aceh;
Rosak iman kerana nafsu,
Rosak hati kerana kasih.
440. Raja Maluku meminjam kuda,
Kuda dipinjam kuda maulana;
Tuanku nyawa orang muda,
Bertambah arif bijaksana.

441. Sarung kertas batang cendana,
Sibur kaca berisi gula;
Datanglah arif yang bijaksana,
Akan penghibur hati yang gila.
442. Air jernih sajaknya landai,
Jalan raya titian batu;
Berunding cerdik dengan pandai,
Faham dua menjadi satu.
443. Memberi rehat menunggang kuda,
Kuda dipacu ke sana ke mari;
Inilah nasihat pantun pemuda,
Pemuda bijaksana kasihkan negeri.
444. Cincin baiduri dalam puan,
Jatuh sebetuk dalam raga;
Bukan jauhari kiranya tuan,
Maka tak mahu masuk berniaga.





445. Halminda raja perkasa,
Cucu kepada Birma Sakti;
Sebarang kerja hendak periksa,
Supaya tidak sesal di hati.
446. Bunga anggerik pohon benalu,
Buah berangan dari Jawa;
Kalau cerdas fikir dahulu,
Jangan diri dapat kecewa.
447. Bintang tujuh sinar berseri,
Bulan purnama datang menerpa;
Ajaran guru hendaklah dicari,
Mana yang dapat janganlah lupa.
448. Dari laut kaum nelayan,
Berkayuh perahu bermuat ikan;
Rajin dan usaha asas kesenangan,
Jimat dan cermat asas kekayaan.

449. Orang haji dari Jeddah,
Buah kurma berlambak-lambak;
Pekerjaan guru bukanlah mudah,
Bagai kerja menolak ombak.
450. Tanjung Agas kampung nelayan,
Dikenali sebagai Kuala Bekah;
Jangan sekali dicuai pelajaran,
Perbuatan demikian padahnya susah.
451. Pinang muda dibelah dua,
Manik-manik mati dirambah;
Dari muda sampai tua,
Pengajaran baik jangan diubah.
452. Tetakkan parang ke dahan sena,
Belah buluh taruhkan temu;
Sebarang kerja takkan sempurna,
Bila tidak menaruh ilmu.





453. Rumah baru berpintu kaca,
Rumah Tuanku Malim Sutan;
Ambil buku mari dibaca,
Perintang hati diharu syaitan.
454. Asam pauh dari seberang,
Tumbuhnya dekat tepi tebat;
Badan jauh di rantau orang,
Sakit siapa akan mengubat.
455. Apa digulai orang di ladang,
Pucuk kacang sela-bersela;
Apakah untung anak dagang,
Hari petang tangga berhela.
456. Pecah belah batu di gunung,
Seri Dewa berjalan malam;
Ya Allah tidak tertanggung,
Rasa tidak dikandung alam.

457. Tidak salah bunga lambayung,
Salahnya pandan menderita;
Tidak salah bonda mengandung,
Salah badan buruk pinta.
458. Kalau begini tarah papan,
Ke barat juga akan condongnya;
Kalau begini untung badan,
Melarat juga kesudahannya.
459. Hujan turun badan pun basah,
Patah galah haluan perahu;
Niat di hati tak mahu berpisah,
Kehendak Allah siapa yang tahu.
460. Halia ini tanam-tanaman,
Ke barat juga akan rebahnya;
Dunia ini pinjam-pinjaman,
Ke akhirat juga akan sudahnya.





461. Nyiur muda luruh setandan,
Diambil sebiji lalu dibelah;
Sudah nasib permintaan badan,
Kita di bawah kehendak Allah.
462. Berjalan jauh cepat lelah,
Duduk sebentar berhenti rehat;
Orang beriman disayangi Allah,
Dapat balasan dunia akhirat.
463. Kemuning di dalam semak,
Jatuh melayang ke dalam paya;
Walau ilmu setinggi tegak,
Tidak sembahyang apa gunanya.
464. Sapu tangan di dalam dulang,
Anak udang mati dituba;
Dalam kitab telah melarang,
Perbuatan haram jangan dicuba.

465. Banyak masa antara masa,
Tidak seelok masa bersuka;
Tinggalkan sembahyang jadi biasa,
Tidakkah takut api neraka?
466. Bunyi tabuh berbunyi gong,
Tanda istiadat sudah bermula;
Walaupun harta setinggi gunung,
Amalan soleh yang diambil kira.
467. Anak ayam turunnya lima,
Mati seekor tinggallah empat;
Kita hidup mesti beragama,
Supaya hidup tidaklah sesat.
468. Lompat ketam tikam batu,
Mainan kanak-kanak sebaya;
Hanya Allah jua yang satu,
Tempat kita meminta semuanya.





469. Encik Mol orang kerani,
Terkemut-kemut bila meniti;
Tinggalkan sembahyang terlalu berani,
Seperti tubuhnya tidakkan mati.
470. Hidangan sudah tersaji di meja,
Ajak makan tuan haji;
Kalau ilmu tak cukup di dada,
Jangan berani menjadi kadi.
471. Jahat mulut suka mencaci,
Duduk berlonggok suka berlabun;
Siapa kata Tuhan pembenci,
Padahal Allah maha pengampun.
472. Belatuk di atas dahan,
Terbang pergi ke lain pohon;
Hidup mati di tangan Tuhan,
Kepada Allah kita bermohon.

473. Anak ayam turun sepuluh,
Mati seekor tinggal sembilan;
Bangun pagi sembahyang subuh,
Minta doa kepada Tuhan.
474. Budak-budak main peluru,
Ambil sebutir ditembakkan;
Jikalau alim jadikan guru,
Jikalau jahil tunjuk ajarkan.
475. Harimau sekuci turun sekawan,
Mati ditikam si janda balu;
Ilmu akhirat tuntutlah tuan,
Barulah sempurna segala fardu.
476. Asam kandis asam gelugur,
Ketiga asam si riang-riang;
Menangis mayat di pintu kubur,
Mengingatkan jasad tidak sembahyang.





477. Cuaca gelap semakin redup,
Masakan boleh kembali terang;
Budi bahasa amalan hidup,
Barulah kekal dihormati orang.
478. Buat apa berkain batik,
Kalau tidak dengan sucinya;
Buat apa isteri cantik,
Kalau tidak dengan budinya.
479. Jikalau telur beranakkan jantan,
Pelihara baik-baik jangan mati;
Jika kita sayangkan watan,
Sama-samalah kita menabur bakti.
480. Lihat padi menguning indah,
Semuanya Allah punya kuasa;
Hendak berbakti bukannya mudah,
Apa lagi menabur jasa.

481. Terbang luas sayup di mata,
Kita mengetam beramai-ramai;
Kalau mahu berbuat jasa,
Budi baik hendak disemai.
482. Baik-baik bertanam padi,
Jangan sampai dimakan rusa;
Baik-baik termakan budi,
Jangan sampai badan binasa.
483. Burung-burung terbang ke sarang,
Hari petang dekat senja;
Budi orang hendaklah dikenang,
Barulah kita dianggap mulia.
484. Tepi pantai tanam kelapa,
Jangan ditanam kelapa bali;
Berbuat baik pada ibu bapa,
Masuk syurga tentu sekali.





485. Sirih sekapur bawa berniaga,
Sirih tidak dijual beli;
Buat baik berpada-pada,
Buat jahat jangan sekali.
486. Puas sudah kutanam ubi,
Nenas juga dipandang orang;
Puas sudah aku berbudi,
Emas juga dipandang orang.
487. Kalau ada jarum yang patah,
Jangan disimpan di dalam peti;
Kalau ada silap dan salah,
Jangan disimpan di dalam hati.
488. Tanam serai tanam halia,
Tanam juga pokok sengkang;
Orang berbudi disanjung mulia,
Ke mana pergi tiada terbang.

489. Tampi melukut di hujung tambak,
Orang kota memasang ranjau;
Kalau takut dilambung ombak,
Sayulah mata memandang pulau.
490. Tetak pandan di tepi bendang,
Terbang ke desa burung kenari;
Tercampak badan di rantau orang,
Budi bahasa pelindung diri.
491. Tenang-tenang air di laut,
Sampan kolek mudik ke tanjung;
Hati terkenang mulut menyebut,
Budi sedikit rasa nak junjung.
492. Petik nenas batang bertimbun,
Paya berlopak pandan melintang;
Siang berpanas malam berembun,
Rezeki secupak jadikan segantang.





493. Angin teluk menyisir pantai,
Hanyut rumpai di bawah titi;
Biarlah buruk kain dipakai,
Asalkan pandai mengambil hati.
494. Berarak mega ditiup bayu,
Seludang mayang gugur ke taman;
Bunga dipuja sebelum layu,
Jasa dikenang sepanjang zaman.
495. Berbunga lebat pohon rambutan,
Hinggap tempua berjuntai kaki;
Bila dapat memandang bulan,
Jangan lupa rumput di bumi.
496. Hijau rumput di tepian mandi,
Kembang berseri bunga senduduk;
Elok diturut resmi padi,
Semakin berisi semakin tunduk.

497. Bakar gaharu di tengah halaman,
Asamkan karat si pisau raut;
Kalau berguru salah pedoman,
Sesat di darat karam di laut.





*Pantun
Dua
Kerat*



498. Guni kapur kirim pak mentua,
Nyanyi di dapur kahwin orang tua.
499. Ujung bendul dalam semak,
Kerbau mandul banyak lemak.
500. Orang berbudi kita berbahasa,
Orang memberi kita merasa.
501. Terima kasih daun keladi,
Kalau boleh berjumpa lagi.
502. Siakap senohong, gelama, ikan duri,
Bercakap bohong lama-lama mencuri.

503. Kalau padi taruh sama beras,
Kalau tak mati boleh balas.
504. Cekur udang gamit,
Mintak cekur beri kunyit.
505. Pokok tinggi buruk akar,
Matahari tinggi perut pun lapar.
506. Ikan todak makan meranggung,
Sedap tekak badan menanggung.
507. Tuku takal pengancing pintu,
Budak nakal memang begitu.





508. Berniaga buluh kasap,
Untung habis modal lesap.
509. Pat-pat nya,
Siapa dapat dia punya.
510. Cerang ceruk siamang bergalas,
Orang gemuk memang malas.
511. Sebab pulut santan binasa,
Sebab mulut badan merasa.
512. Gendang gendut tali kecapi,
Kenyang perut suka hati.

513. Piringan retak nasi tak dingin,
Orang tak hendak aku tak ingin.
514. Tua-tua keladi,
Makin tua makin menjadi.
515. Kalau tak cengal giam,
Kalau tak kenal diam.
516. Lain dulang lain kakinya,
Lain orang lain hatinya.
517. Kayu lurus tengah padang,
Kerbau kurus banyak tulang.





518. Ada beras taruh dalam peti,
Ada hajat taruh dalam hati.
519. Umbut mayang letak di batu,
Rambut mengembang banyak kutu.
520. Sici, loro, telu, papat,
Melayu lari Jawa dapat.
521. Kayu bongkok tepi tiang,
Ayam berkokok hari nak siang.
522. Daripada cempedak biarlah nangka,
Daripada tiada baiklah ada.

523. Sudah gaharu cendana pula,
Sudah tahu bertanya pula.
524. Paku dulang paku serpih,
Mengata orang dia yang lebih.
525. Tinggi rendah panjang lebar,
Pergi sekolah mesti belajar.
526. Ayam bulat makan beras,
Bangun lambat dapat laki malas.
527. Kembang jarak kembang jagung,
Berani bawa berani tanggung.





528. Lima, enam, tujuh, lapan,
Kuat bersenam sihatkan badan.
529. Pagi, petang, siang, malam,
Hari terang senang faham.
530. Ada ubi ada batas,
Ada hari boleh balas.
531. Banyak udang banyak garam,
Banyak orang banyak ragam.
532. Kura-kura dalam perahu,
Pura-pura tidak tahu.

533. Satu, dua, tiga, empat,
Siapa cepat dia dapat.
534. Pisang sesikat, gulai sebelanga,
Tanda muafakat, bersama-sama.
535. Langit berkelikir, bumi bertemberang,
Salah-salah fikir, jadi teman orang.
536. Kijang menyeberang, tinggal anaknya,
Pisang ditebang, tinggal anaknya.
537. Buah sintang, buah senikul,
Satu memegang, satu memikul.





538. Emas, perak, tembaga, suasa,
Malas bergerak, tidak merasa.
539. Hitam-hitam pucuk kawa,
Sungguh hitam dipandang lawa.
540. Sarang semut dalam gelap,
Orang selimut lalu lelap.
541. Berapa jauh wujud dengan sifat,
Sejauh lutut dengan pelipat.
542. Tupai batuk di Kuala Muar,
Matahari masuk damar keluar.

543. Kerennyah, kerennyit,
Akar ke tanah, pucuk ke langit.
544. Puk pang kepala kuda,
Bongkok belakang berbulu dada.
545. Tuk Peh sembahyang,
Jatuh upih tinggal mayang.
546. Katak kacang, kuda kandis,
Masak masam, muda manis.





*Pantun
Snam
Kerat*



547. Bunga kujerat dalam taman,
Ikan berenang dalam tebat,
Suntingkan pada anak dara;
Tuan yang sangat diharapkan,
Junjungan sampai ke akhirat,
Pembimbing badan ke syurga.

548. Baik ditanam batang padi,
Jauhkan tampang anak pisang,
Halaukan sapi dalam rimba;
Adakah penyayang orang di sini,
Bawa menumpang anak dagang,
Kalau nanti membalas guna.

549. Kuda liar berkeliling kota,
Kota terbuat daripada kayu,
Tempat berkawal lasykar Peringgi;
Kami mendengar khabar berita,
Bunga yang kembang sudah pun layu,
Gugur ke bumi tak harum lagi.

550. Anak memerang memakan sagu,
Di perdu budak di air tenang,
Ketika hari senjakala;
Gadis orang jangan diganggu,
Kalau hendak masuklah meminang,
Supaya diri tidak terhela.





551. Buah selasih di atas batang,
Sudah dipetik jangan dibawa,
Jangan dibawa ke dalam perahu;
Mencurah kasih tempat tak sayang,
Orang ketawa kita ketawa,
Orang benci kita tak tahu.

552. Penakik pisau raut,
Ambil galah batang lintabung,
Seludang dijadikan nyiru;
Setitik dijadikan laut,
Sekepal dijadikan gunung,
Alam terbentang dijadikan guru.

553. Jalan kaki berbatu-batu,
Pergi mencari si anak kuda,
Lepas lari terus hilang;
Ingatlah pesan cikgu,
Tuntut ilmu selagi muda,
Bila tua barulah senang.

554. Bergayut-gayut si anak ungka,
Cukup takut bila dimandi,
Lari keluar masuk ke kota;
Sayang saudara masa suka,
Sayang emak sayang abadi,
Sayang kekasih masa bercinta.





555. Pandan berbunga sekali,
Anak harimau kena ipuh,
Destar tertenggek di kepala;
Jauh daratan dilalui,
Pelbagai bahaya ditempuh,
Di sini kita bersua pula.

556. Banyak kuda makan di padang,
Kudanya tua-tua belaka,
Berjalan pun perlahan-lahan;
Banyak muda sudah kupandang,
Semuanya elok-elok belaka,
Tak sama adik pilihan.

557. Masuk santan dalam gulai,
Tambah sedikit daun bayam,
Gulai dimakan dengan nasi;
Selama kita mula bercerai,
Nasi ditelan rasa sekam,
Air diminum rasa duri.
558. Bila gelap pasang pelita,
Namun hari masih cerah,
Di luar masih terang cahaya;
Jika sudah begitu dipinta,
Hutang darah dibayar darah,
Hutang nyawa, nyawa padahnya.





559. Bukan kesumba pakaian raja,
Kesumba pakaian sultan,
Sultan Yang Di Pertuan Muda;
Bukan hamba ke mari sengaja,
Ke mari membawa pesan,
Perintah tak boleh ditunda.

560. Selasih di rimba Jambi,
Rotan ditarik orang Pauh,
Putus akarnya di jerami;
Kasih pun baru dimulai,
Tuan bawa berjalan jauh,
Itu menghiba hati kami.

561. Dari Agam ke Kuraitaji,
Makan di jalan buah peria,
Pergi ke hulu Sungai Rokan;
Jika tuan mungkirkan janji,
Tuan dimakan sumpah setia,
Menjadi duyung di lautan.

562. Nyiur gading tinggi menjulang,
Masak ketupat berisi inti,
Buah delima di dalam cawan;
Hancur daging berkisi tulang,
Belum dapat belum berhenti,
Hendak bersama denganmu tuan.





*Pantun
Lapan
Kerat*



563. Bertanam padi di sawah,
Ditimbun dengan hampa berat,
Dicangkul dengan beladang,
Dijual oleh anak Bangkahulu;
Kalau menguji nak sama merah,
Kalau mengganti nak sama berat,
Kalau mengukur nak sama panjang,
Itulah hukum pada penghulu.

564. Buat bangsal di tengah hutan,
Tebaslah hutan buat halaman,
Di tepi halaman menanam kandis,
Diselang dengan asam paya;
Biarlah sabar dengan perlahan,
Itulah tanda tuan beriman,
Tidak patah digoncang iblis,
Akhirnya tuan menang berjaya.

565. Pasir bulan dalam perahu,
Berlabuh tentang batu bara,
Bercimat lalu ke tepian,
Ke Tiku mengadap muaranya;
Kasih tuan hamba Allah tahu,
Sebagai orang mengandung bara,
Terasa hangat dilepaskan,
Begitu benar malah kiranya.

566. Rumpun rotan di kota alam,
Ditebang dibela empat,
Tumbuh serumpun di seberang,
Selasih muara sungkai;
Penglihatan usah diperdalam,
Pandang yang usah dipertepat,
Adik di dalam tangan orang,
Maksud rasa takkan sampai.






567. Sejak berbunga daun pandan,
Banyaklah tikus di permatang,
Anak buaya datang pula,
Daun selasih tambah banyak;
Sejak semula dagang berjalan,
Tidak putus dirundung malang,
Banyak bahaya yang menimpa,
Namun kasih berpaling tidak.
568. Tajak-tajak perdu serai,
Habis tertajak lalang-lalang,
Lebar kawasan cuma sedepa,
Tempat bertanam pokok kacang;
Sejak mula hamba sampai,
Tidak putus dirundung malang,
Fitnah datang bertimpa-timpa,
Namun iman tak pernah goncang.

569. Sudah penat berjalan kaki,
Seluruh badan terasa uzur,
Tak tahan lagi diuji,
Tempatnya jauh di ujung lembah;
Pantang saya anak lelaki,
Kalau melangkah kembali undur,
Tidak gentar sebarang uji,
Kental azam, yakin dan tabah.

570. Sipa berlangir di tepian,
Biarlah sama-sama pulang,
Ikut jalan ke lembah,
Melalui tanah yang rata;
Kita belayar harung lautan,
Tak gentar mara yang datang,
Sayang tinggal di rumah,
Makan berkuahkan air mata.





571. Naik gunung Rimba Kelibut,
Ke rimba berkayu jati,
Kayu sedang banyak berbuah,
Bercampur dengan kayu kamat;
Gagap gentar hamba menyebut,
Penghulu banyak yang sakti,
Tuanku banyak yang bertuah,
Alim ulama banyak yang keramat.

A decorative border with intricate floral and scrollwork patterns surrounds the central text. The border is composed of repeating motifs of stylized flowers, leaves, and swirling lines, creating a frame for the title.

*Pantun
Sepuluh
Kerat*



572. Pohon meranti tumbang di lurah,
Terbang tekukur ke tengah bendang,
Hanyut kiambang bersimpul urat,
Patah titi timpa-menimpa,
Orang gurun pulang ke hulu;
Kalau menguji sama merah,
Bila mengukur sama panjang,
Kalau menimbang sama berat,
Bila membahagi sama rata,
Begitulah hukum pada penghulu.

573. Ke lepau sekali ini,
Entah membeli entahkan tidak,
Entah membeli limau kapas,
Entah melambung limau gedang,
Pecah belah dalam perahu;
Merantau sekali ini,
Entah kembali entahkan tidak,
Entah mengharung laut lepas,
Entah hilang di rantau orang,
Gerak Allah siapa tahu.

574. Baju dasar kesumba,
Seluar gunting Petani,
Jahitan Nyonya Kampung Erah,
Di hilir pasar Kampung Melaka,
Singgah di rumah nakhodanya;
Batang emas dahan suasa,
Buahnya intan dengan padi,
Bunga dihisap burung merak,
Pipit hendak hinggap di ranting,
Adakah boleh oleh yang empunya.

575. Turun hujan hari dah petang,
Bunga mawar tumbuhnya subur,
Ditiup angin habis tunduk,
Dipetik jangan dicabutkan,
Tanaman puteri dari Jawa;
Telah habis rokok sebatang,
Telah punah sirih sekapur,
Pasar sudah tempat duduk,
Penatlah sahaja menantikan,
Buah hati tak muncul jua.





*Pantun
Berkait*



576. Candik-candik pisang di Jambi,
Menggulai saja yang belum;
Bertanah sudahlah kami,
Menggulai saja yang belum.
577. Menggulai pisang di Jambi,
Berseludung saja yang belum;
Menggulai sudahlah kami,
Bertanak saja yang belum.
578. Berseludung pisang di Jambi,
Bersikat saja yang belum;
Bertanak sudahlah kami,
Berhidang saja yang belum.

579. Bersikat pisang di Jambi,
Mangkal saja yang belum;
Berhidang sudahlah kami,
Bersantap saja yang belum.
580. Anak ayam turun sepuluh,
Mati seekor tinggal sembilan;
Bangun pagi sembahyang subuh,
Minta doa kepada Tuhan.
581. Anak ayam turun sembilan,
Mati seekor tinggallah lapan;
Minta doa kepada Tuhan,
Moga-moga Allah makbulkan.





582. Anak ayam turunlah lapan,
Mati seekor tinggallah tujuh;
Moga-moga Allah makbulkan,
Dapat nanti seorang jodoh.
583. Anak ayam turunlah tujuh,
Mati seekor tinggallah enam;
Dapat nanti seorang jodoh,
Sebagaimana yang kamu idam.
584. Anak ayam turunlah enam,
Mati seekor tinggallah lima;
Sebagaimana yang kamu idam,
Elok muafakat hidup bersama.

585. Orang berpadi di tanah liat,
Di Mekah banyak buah pedada;
Mayat tiada dapat dilihat,
Seperti merekah rasanya dada.
586. Di Mekah banyak buah pedada,
Bunga Tanjung di atas rakit;
Seperti merekah rasanya dada,
Terkenangkan untung dengan nasib.
587. Bunga Tanjung di atas bukit.
Serambi di muka pintu;
Terkenangkan untung dengan nasib,
Maka sampai sehingga situ,





588. Serambi di muka pintu,
Pergi ke parit hendak merayau;
Maka sampai sehingga situ,
Ratu Amas berbalik ke Riau.

589. Pergi ke parit hendak merayau,
Situlah banyak ubi kemili;
Ratu Amas berbalik ke Riau,
Duduk mendiam-diamkan diri.

590. Burung belibis di atas lantai,
Buah rambai dalam padi;
Tuan Raffles orang yang pandai,
Tahu sungguh mengambil hati.

591. Buah rambai dalam padi,
Lazat cita pula rasanya;
Tahu sungguh mengambil hati,
Serta dengan budi bahasanya.

592. Lazat cita pula rasanya,
Jeruju dengan durinya;
Serta dengan budi bahasanya,
Setuju pula dengan isterinya.

593. Jeruju dengan durinya,
Di tepi jalan orang berlari;
Setuju pula dengan isterinya,
Seperti bulan dengan matahari.





594. Anak gajah tahu terum,
Terum dengan gembalanya;
Anak raja cucu marhum,
Senyum dengan tertawanya.
595. Terum dengan gembalanya,
Sukat jarum bergantang-gantang;
Senyum dengan tertawanya,
Keturunannya dari Bukit Seguntang.
596. Sukat jarum bergantang-gantang,
Pisau kecil jadi peraut;
Keturunan dari Bukit Seguntang,
Asalnya keluar dari laut.

597. Pisau kecil jadi peraut,
Padi pulut rendangkan bertih;
Asalnya keluar dari laut,
Berpayang iram-iram bergajah putih.

598. Lebah terbebar terbang sekawan,
Hinggap di celah kayu berduri;
Alangkah cabar rupanya tuan,
Dagangan indah tidak terbeli.

599. Hinggap di celah kayu berduri,
Kepayang tumbuh di dalam dulang;
Dagangan indah tidak terbeli,
Sayang sungguh nyawanya hilang.





600. Kepayang tumbuh di dalam dulang,
Burung merpati terbang ke awan;
Sayang sungguh nyawanya hilang,
Tidak seperti Raja Pahlawan.

601. Tabur bayam di pangkal tebu,
Buang jerami berikat rotan;
Laksana ayam kehilangan ibu,
Begitulah kami kehilangan tuan.

602. Buang jerami berikat rotan,
Lurutkan minyak ke daun padi;
Begitulah kami kehilangan tuan,
Yang banyak menanam budi.

603. Lurutkan minyak ke daun padi,
Lipat tuala bersusun bunga;
Yang banyak menanam budi,
Tiada upaya kami membalasnya.
604. Lipat tuala bersusun bunga,
Suntingkan kenanga berawan larat;
Tiada upaya kami membalasnya,
Dari dunia hingga akhirat.
605. Orang berhuma di Pulau Bulangan,
Asap api tabun-menabun;
Tuan laksana bunga kayangan,
Kuntum kasturi tangkainya embun.





606. Asap api tabun-menabun,
Orang menjala ikan temulih;
Kuntum kasturi tangkainya embun,
Dipandang ada diambil tak boleh.

607. Orang menjala ikan temulih,
Pungut penggaga musim tengkujuh;
Dipandang ada diambil tak boleh,
Ditunggu naga berkepala tujuh.

608. Pungut penggaga musim tengkujuh,
Buat rampai menggulai ikan;
Ditunggu naga berkepala tujuh,
Bunga melambai minta lepaskan.

609. Burung serindit di dahan cempaka,
Jatuh menimpa dayung petani;
Sumpah perajurit di bumi merdeka,
Taat setia gagah berani.
610. Jatuh menimpa dayung petani,
Dara menatang dulang suasa;
Taat setia gagah berani,
Rela berjuang sepanjang masa.
611. Dara menatang dulang suasa,
Ke sungai datar pergi membasuh;
Rela berjuang sepanjang masa,
Tiada gentar menentang musuh.





612. Ke sungai datar pergi membasuh,
Hinggap tempua mencari sarang;
Tiada gentar menentang musuh,
Senandung jiwa di medan perang.

613. Hinggap tempua mencari sarang,
Daun meranti gugur berjejal;
Senandung jiwa di medan perang,
Berpantang mati sebelum ajal.

614. Daun meranti gugur berjejal,
Buah pinang pecah di taman;
Berpantang mati sebelum ajal,
Jasa dikenang zaman-berzaman.

615. Pantai redup di Tanjung Jati,
Patah pinang menimpa suasa;
Nilai hidup teman sejati,
Susah senang sama dirasa.
616. Patah pinang menimpa suasa,
Pasir lumat karangan berendam;
Susah senang sama dirasa,
Bersatu niat membuang dendam.
617. Pasir lumat karang berendam,
Daun cemara gugur meniti;
Bersatu niat membuang dendan,
Kalungkan setia di gerak hati.





618. Daun cemara gugur meniti,
Terbang punai menuju pangkalan;
Kalungkan setia di gerak hati,
Rukun damai seiring jalan,
619. Pangkal berbelit di pohon jarak,
Jarak nan tumbuh di tepi serambi;
Jangan dibuat yang larang syarak,
Itulah perbuatan yang dibenci nabi.
620. Jarak nan tumbuh di tepi serambi,
Pohon kerekot bunganya sama;
Itulah perbuatan yang dibenci nabi,
Petua diikuti segala ulama.

621. Pohon kerekot bunganya sama,
Buahnya boleh dibuat colok;
Petua diikuti segala ulama,
Jangan dibawa berolok-olok.

622. Buahnya boleh dibuat colok,
Colok dipotong dengan sekin;
Jangan dibawa berolok-olok,
Hendaklah diturut dengan yakin.

623. Colok dipotong dengan sekin,
Sekin waja buatan Jawa;
Hendaklah diturut dengan yakin,
Yakin di hati selamatlah nyawa.





624. Sekin waja buatan Jawa,
Dibawa orang ke Melaka;
Yakin di hati selamatlah nyawa,
Tidak gerangan akan celaka.
625. Sekin dibawa ke Melaka,
Disembahkan kepada bendahara;
Tidak gerangan akan celaka,
Tubuh pun lepas dari sengsara.
626. Disembahkan kepada bendahara,
Bendahara Datuk Seri Paduka;
Tubuh pun lepas dari sengsara,
Sengsara masuk dalam neraka.

627. Bendahara Datuk Seri Paduka,
Memerintah kota dan negeri;
Sengsara masuk dalam neraka,
Hendaklah kita ingatkan diri.
628. Memerintahkan kota dan negeri,
Pagi dan petang berbunyi nobat;
Hendaklah kita ingatkan diri,
Pagi dan petang hendaklah taubat.
629. Pagi dan petang berbunyi nobat,
Nobat beragam bernama Khalil;
Pagi dan petang hendaklah taubat,
Taubat mengikut hadis dan dalil.





630. Nobat beragam bernama Khalil,
Dipalu nobat di rumah raja;
Taubat mengikut hadis dan dalil,
Itulah kita empunya kerja.

631. Dipalu nobat di rumah raja,
Raja keturunan Bukit Siguntang;
Itulah kita empunya kerja,
Patut diturut pagi dan petang.

A decorative border of black line art surrounds the central text. It features stylized floral motifs, including leaves, small flowers, and circular accents, arranged in a circular pattern around the central oval.

*Pantun
Peribahasa*



632. Hulubalang pergi berperang,
Gempita bunyi gendang dipalu;
Jangan suka serkap jarang,
Nanti sendiri yang terima malu.
633. Lalu di depan bongkok menunduk,
Tanda hormat tidaklah takbur;
Ibarat telur di hujung tanduk,
Jika tergolek pecahlah tersembur.
634. Kayu keras si kayu kempas,
Alas tempat orang berjudi;
Ada beras kerja pun deras,
Ada padi kerja pun menjadi.

635. Pendekar handal di tengah gelanggang,
Pendekar bergelar Raja Saksama;
Bagaikan pipit dengan enggang,
Manakan boleh terbang bersama.
636. Tinggi sungguh Gunung Daik,
Mercunya nampak terang berkilau;
Kalau asal benih yang baik,
Jatuh ke laut menjadi pulau.
637. Dara bersimpuh di hujung bendul,
Sambil leka bersebang-sembang;
Cakap tidak pernah betul,
Macam lidah tidak bertulang.





638. Budak-budak bermain rakit,
Rakit buluh tolong buatkan;
Harap-harap guruh di langit,
Air di tempayan dicurahkan.
639. Satu tangan jarinya lima,
Dua tangan jarinya sepuluh;
Saya tanam pokok delima,
Mengapa peria pula yang tumbuh.
640. Anyam sarung ketupat pulut,
Ketupat hendak direbus juga;
Tidak sudahnya seluang melaut,
Akhirnya kembali ke pantai juga.

641. Orang gagah pergi berperang,
Terlalu berani lagi perkasa;
Gajah mati tinggalkan tulang,
Manusia mati tinggalkan jasa.
642. Hujan panas turun berderai,
Guruh menyambar pohon jati;
Kasih sayang tak boleh bercerai,
Bagaikan rambut bersimpul mati.
643. Sungguh dalam di tengah lautan,
Tempat bertapa sang buaya;
Sesal dahulu ada pendapatan,
Sesal kemudian tiada gunanya.





644. Pergi ke rumah Cik Mariam,
Ramai orang tengah berjaga;
Carik-carik si bulu ayam,
Lama-lama bercantum juga.
645. Ombak badai gulung-menggulung,
Kelasi terdampar di tepi pantai;
Hajat hati nak peluk gunung,
Apakah daya tangan tak sampai.
646. Tarik dayung berderap-derap,
Hendak melawan sampan kotak;
Dia ibarat si bunga dedap,
Sungguh pun merah berbau tidak.

647. Sayur kucai sayur tumis,
Gatal sungguh getah jelatang;
Dua-dua sama manis,
Bagaikan bulan dipagar bintang.
648. Kalau mandi pergi ke tebat,
Tunggu malam bulan mengambang;
Kalau berjanji tak pernah tepat,
Macam biawak lidah bercabang.
649. Cabang apakah tidak bergetah,
Kiranya embun turun pagi;
Tanah tak lekuk, kayu tak patah,
Ular dipalu mestilah mati.





650. Angin turun bersama ribut,
Melanda segala apa jua;
Kasih ibarat embun di rumput,
Datang panas keringlah ia.
651. Berburu ke padang datar,
Dapat rusa berbelang kaki;
Berguru kepalang ajar,
Bagai bunga kembang tak jadi.
652. Jika sudah menjadi pantang,
Jangan dicuba jangan dicari;
Kusangka panas hingga ke petang,
Rupanya hujan di tengah hari.

653. Dara sunti berhias di cermin,
Sedang melentikkan si bulu mata;
Dua mempelai di atas pelamin,
Seperti cincin dengan permata.

654. Nyiur gading puncak mahligai,
Sarung ketupat berisi inti;
Hancur daging tulang berkecai,
Belum dapat belum berhenti.

655. Hang Nadim Hang Setia,
Dua-dua pahlawan Melayu;
Tidak kusangka begitu dia,
Ada udang di sebalik batu.





656. Satu, dua, tiga, empat,
Lima, enam, tujuh setengah;
Sepandai-pandai tupai melompat,
Sekali sekala jatuh ke tanah.
657. Burung puyuh burung tabtibau,
Terbang tinggi si burung bayan;
Di dalam kilat ada kilau,
Rupanya awan mengandung hujan.
658. Cengkerik-cengkerik memakan bayam,
Rama-rama memakan pegaga;
Carik-carik bulu ayam,
Lama-lama bercantum juga.

659. Kerat-kerat kayu di ladang,
Hendak dibuat hulu cangkul;
Berapa berat mata memandang,
Berat lagi bahu memikul.
660. Budak-budak membawa payung,
Jalan berempat ke rumah Nyonya;
Kalau tidak dipecah ruyung,
Masakan dapat akan sagunya.
661. Hari hujan puyuh mendengut,
Mendengut mari sepanjang jalan;
Air dalam kapal tak hanyut,
Kononlah pula kemarau panjang.





662. Terap nasi tumbuh di bukit,
Belat berjajar panjang ke hulu;
Kerap terjadi guruh di langit,
Kilat memancar hujan tak lalu.
663. Batang tegar dibuat rakit,
Rotan di dahan dibelah-belahkan;
Jangan mendengar guruh di langit,
Air tempayan dicurahkan.
664. Pisau kecil tajam di pangkal,
Buat meraut tongkat penaga;
Kalau kail panjang sejengkal,
Jangan laut hendak diduga.

665. Padi lembut dari Senggora,
Mari dimasak buat ketupat;
Mati semut kerana gula,
Mati bajak makan diangkut.
666. Buah langsung kuning mencelah,
Senduduk tidak berbunga lagi;
Sudah dapat gading bertuah,
Tanduk tidak berguna lagi.
667. Anak merbah terlompat-lompat,
Anak endung ketitiran;
Yang dilelah tiada dapat,
Yang dikendong berciciran.





668. Buah berangan masak merah,
Kelekatu dalam perahu;
Luka di tangan tampak berdarah,
Luka di hati siapa yang tahu.
669. Dalam semak ada duri,
Ayam kuning buat sarang;
Orang tamak selalu rugi,
Seperti anjing merebut bayang.
670. Padi tuan batangnya kurus,
Bubuhlah baja berbancuh garam;
Hati tuan bukannya lurus,
Pepat di luar rencong di dalam.

671. Kipas kertas lipat di pangkal,
Mengipas radang tengah hari;
Lepas ke atas tak ingat asal,
Lupa si kacang kulit sendiri.





*Pantun
TeKa - TeKi*



672. Ada satu burung dewata,
Kukunya panjang seperti senjata;
Wajib ia berkata-kata,
Jika duduk di tempat yang rata.

(Pen dengan kertas)

673. Hitam legam seperti hantu,
Belakang hadapan sama suatu;
Ekor kepala tiada tentu,
Dihadap orang kala waktu.

(Papan hitam)

674. Ada satu isteri yang baik,
Ia berjalan adik-beradik;
Sebab budi bahasa baik,
Enam puluh anak dididik.

(Jam)

675. Budak-budak ramai di pekan,
Hari raya membakar petas;
Kalau awak pandai kias,
Apakah buah gugur ke atas?

(Buah melaka)

676. Kalau tuan tombak rencana,
Ambil gantang sukatkan pulut;
Kalau tuan bijak laksana,
Apa binatang tiada berperut?

(Udang)

677. Bulat dia macam telinga,
Tumbuhnya dia merata-merata;
Bila hujan banyaklah dia,
Boleh disayur berbagai cara.

(Cendawan)





678. Jika tuan membeli tikar,
Tikar anyaman dari mengkuang;
Jika tuan orang yang pintar,
Ular apakah yang membelit pinggang?

(Tali pinggang)

679. Bunyi bisung seperti syaitan,
Terhinggut-hinggut jalan perlahan;
Badannya panjang seperti lipan,
Sanggup memikul seberat-berat muatan.

(Kereta api)